

# درود الی دے گجرے سلا ماں دے پھل



مرتب:

اقبال زخمی



# دروداں دے گجرے سلا ماں دے پھل

26

مرتب:

## اقبال زخمی

---

بنم غلامان مصطفیٰ

جیاموسی شاہدرہ لاہور

# سلا ماں دے حق را کھویں

دروداں دے گجرے سلا ماں دے پھل

ہدیہ:- اک سو دیہہ روپے

پہلی وار:- مئی 2006ء

بزم غلامانِ مصطفیٰ ﷺ

جیا موسیٰ شاہدرہ لاہور

خادم پرنٹنگ پریس لاہور وچ چھپی

## DROODAN DEY GUJRAY SLAMAN DEY PHUL

A collection of Drood-o-Slam

Edit by Mian Iqbal Zakhmi

bani Bazm-e- ghulaman-e-Mustfa

Jeya musa Shahdara Lahore

Price Rs. 100.00

Ph.042-7920929 Mob.03004988665

## نذرانہ

ادبوں ایہ نذرانہ زخمی اوہدے قد میں دھرناں  
 اللہ اتے فرشتے اوہدے جس تے پڑھن درود  
 ہندا حکم خدا دی طرفوں مومن بندیاں تائیں  
 خوب صلوٰۃ سلاماں بھیجن نالے پڑھن درود  
 ذکر اذکار دی محفل ہووے یا محفل میلاد  
 جدوی ناں آقا علیہ السلام دا آوے سارے پڑھن درود  
 شالا ایہ نذرانہ میرا پا جاوے منظوری  
 فیر مدینے پہنچن دی مٹر آ جاوے منظوری

صبح شامیں دے راتیں ہر زخمی و خیفہ اے  
 درود ہر دم رہواں پڑھدا میں ہر ویلے سلام آکھاں  
 (میاں اقبال زخمی)



# دروداں دے گجرے

10	میاں اقبال زخمی	درود و سلام دی روایت
19	آتش کیانی	عرشاں دے مہمان محمد صلی اللہ علیہ وسلم
20	ارشاد شاہد	دو جگ دے مختار محمد صلی اللہ علیہ وسلم
21	سیٹھ اسق	دل میرا بے تھاں تہاں تہاں صلی اللہ علیہ وسلم
22	اسلم شوق	عرشاں دا مہمان محمد صلی اللہ علیہ وسلم
23	افضال انور	آپ دے عشق وچ اتھر وچھم چھم
24	اقبال زخمی	تیری ذات مثالی آقا
25	اقبال نجمی	خدا اولوں پکار آئے پڑھو صل علی سارے
26	انصر عقیل حیدری	میں وی درتے آواں صلی اللہ علیہ وسلم
27	تنویر بخاری	قدرت دے شکار محمد صلی اللہ علیہ وسلم
28	حسن ملک	جسم مطہر شان منزل صلی اللہ علیہ وسلم
29	حنیف زاہد	نئی خود آپ وی سوہنا
30	حنیف صوفی	اکھ دا چاخن دل دی دھڑکن صلی اللہ علیہ وسلم
31	حنیف نازش	جے نہ آؤندے جگ تے میرے نی
32	حنیف نازش	نوری آپ نوکر چاکر صلی اللہ علیہ وسلم
33	حنیف نازش	مٹھری مٹھری آپ دی بولی
34	صوفی محمد دین چشتی	میری جنت تے جان محمد صلی اللہ علیہ وسلم
38	رشید ہادی	مونہہ کر کے پاک مدینے دل
39	ساغر بیٹ	ورہیاں رحمتاں ولادت اے حضور دی
40	ساقی گجراتی	صفناں بھریا آپ داناں اے ﷺ
41	سرور رندھاوا	دن رات پئی پڑھاں صلی علی محمد

- جدوی تیری نعت سداواں صلی اللہ علیہ وسلم 42 شریف انجم
- ذکر نبی دا عالم عالم صلی اللہ علیہ وسلم 43 ڈاکٹر شوکت علی قمر
- پاک نبی تے لکھ درود 44 صائم چشتی
- اللہ پاک دے سوہنے دلبر صلی اللہ علیہ وسلم 45 صحرائی گورداسپوری
- اللہ اللہ تیری عظمت 46 ڈاکٹر صدیق حل
- رب داپیارے حق دادارے 47 طالب چشتی
- خود آپ آہندائے خدا صل علی صل علی 48 میاں ظفر مقبول
- مدینے دے والی داسوہنا بیان ایں صل علی محمد 49 عبدالرزاق محسن
- عشق نبی وچ اکھروندی اے 50 عبدالغنی تائب
- سرور عالم نور مجسم صلی اللہ علیہ وسلم 51 عثمان سالک
- یا محمد مصطفیٰ صل علی صل علی 53 عقیل شانی
- ایں عالم داداالی سوہنا پاک محمد صل علی 54 علی شان
- انساناں وچ سب توں اعلیٰ صلی اللہ علیہ وسلم 55 عمر غنی
- ایہ رب دے محبوب دادارے صلی اللہ علیہ وسلم 56 ڈاکٹر غلام شبیر رانا
- قلب سلامی جان درودی 57 فیض رسول فیضان
- بڑے دلربا نہیں دروداں دے کجرے 58 قمر حجازی
- اللہ دے مہمان محمد صلی اللہ علیہ وسلم 59 قمریزدانی
- محبوب حق خلق دے رہبر صلی اللہ علیہ وسلم 60 رانا کاشف کلیل کاشف
- ناں سوہنا جد چپ دی سدھر صلی اللہ علیہ وسلم 61 کلیم شہزاد
- خود اللہ وی کہندائے صل علی 62 محبوب احمد محبوب
- امت دار کھوالا آیا صلی اللہ علیہ وسلم 63 ممتاز آصف
- سب نبیاں دے سردار محمد صلی اللہ علیہ وسلم 64 نصر اللہ خاں صابر
- بات ضمن عنوان محمد ﷺ 65 نواز امین
- صل علی بنیا صل علی محمد 67 نیاز احمد قادری
- تھاڈی الفت تھاڈی چاہت 68 یونس حسرت امرتسری

# سلاہاں دے پھل

- 70 آپ دی آمد دے ہر حیلے ویلے نوں سلام اخلاق عاطف
- 71 مدینے دے والی سلام آ کھناواں ارشداقبال ارشد
- 72 جہاناں دی جاں تے کروڑاں سلام ارشداقبال ارشد
- 73 مدینے جج جا کے سلام آ کھ آیاں ارشداقبال ارشد
- 74 سلام اس تے جیہڑا خالق دابندہ بن کے ایا اے اعظم چشتی
- 75 غار حرا دے مکین تے سلام اقبال راحت
- 76 ترا سب گنبد بڑی وارڈ ٹھا اقبال زخمی
- 78 مدینے دے پیارو سلام "علیکم اقبال زخمی
- 79 درود پڑھ لو نبی تے سارے سلام آ کھو اقبال ساجد
- 80 میرا سلام لے جا طیبہ نوں جان والے محمد اکرم رضا
- 82 ہے تیری عظمت وی ڈھیر ساری اکرم سعید اکرم
- 83 عجب نظارے خدا دکھاوے اکرم قلندری
- 84 نبی دے عاشق زمانے سارے اکرم قلندری
- 85 شہ دوسرا نوں سلام آ کھناواں امجد اقبال امجد
- 86 صبا در مصطفیٰ تے جا کے کہویں درود و سلام میرا امیر صابری
- 87 سوہنیا تیرا مدینہ الصلوٰۃ والسلام امین بابر
- 88 راہیا جاندا مدینے ول جاویں انصر عقیل حیدری
- 89 نبی محسن پیارے تے سلام آ کھو سلام آ کھو ایم اے آزاد کھوکھر
- 90 رسالت بہاراں تے لکھاں سلام ایم انور بھٹی اختر آبادی
- 91 خیر البشر کہاں یا خیر الانام آ کھاں بشیر الماس بائی
- 92 خاتم الانبیاء تے ہزاراں سلام بشیر منذر



- 93 محبت ادب شوق الفت عقیدت تھیں تنویر بخاری
- 94 زمانے دے والی نوں میرا سلام جاوید پنچھی
- 95 راہیامدینے جا کے میرا سلام آکھیں حنیف قادری
- 96 پاک نبی داکیمڑا دے لفظاں نال مقام حنیف نازش قادری
- 98 ایہ نور دالے خزینہ یارو درود پڑھ لو سلام پڑھ لو حنیف نازش قادری
- 99 مرتبہ اے سب توں اعلیٰ الصلوٰۃ والسلام خالد جاوید
- 100 مدینے دے گلی کوچے بازاراں نوں سلام آکھاں حاجی دلشاد چن رشید ہادی
- 101 آمنہ دے لعل پیارے الصلوٰۃ والسلام ریاض احمد قادری
- 102 تمام کلیاں تے پھل سارے نوری روضے ول درود سلام ڈاکٹر ریاض مجید
- 104 پہنچ کے روضے تے کملی والے سجاد مرزا
- 105 یا مصطفیٰ یا مجتبیٰ سیّدی ذات عتے لکھاں سلام سعید رشم
- 106 سلام آکھاں سلام آکھاں محمد نوں سلام آکھاں سلیم آفتاب سلیم
- 107 آقا میرے سلام علیکم مہر شوکت علی شوکت
- 108 صبح کولوں نوید لے کے صابر چشتی
- 109 میں روز سردار انبیاء نوں صابر نوید
- 110 جتھے پڑھو سلام نبی تے سن دے ہین حضور صائم چشتی
- 111 میں دو جہاناں دے بادشاہ تے صحرائی گورداسپوری
- 112 مدینے دیاں بہاراں تے فضاواں نوں طارق قمری
- 113 کہندیاں نیں سوچاں وچاراں سلام عبدالرزاق محسن
- 114 مسافر مدینے دے قربان جاواں عبدالرشید عاصی
- 115 یا نبی اے سرور الصلوٰۃ والسلام عبدالرشید ملتانی
- 116 نبی دے قدم ماں دے وچ کھلو کے عبدالستار نیازی
- 117 طیبہ دے پر کیف منظر تے بہاراں نوں سلام عبدالستار نیازی
- 118



- مرے آقا محبت دی اداواں نوں سلام ہووے عبد اللہ قاضی 119
- سلام آکھاں نبی سوہنے تے پیارے نوں عثمان سالک مہروی 120
- درود آکھناواں سلام آکھناواں عثمان سالک مہروی 121
- میں ہنجواں دے ہتھیں گھلے تیرے ولے عثمان سالک مہروی 122
- خواہش ہے دل کی مدینے میں جاواں علی شان 123
- راہیا سوہنیا مدینے جا کے میراوی سلام آکھوئیں محمد علی ظہوری 124
- راہیا جاندا مدینے میراوی جا کے سلام کہنا محمد علی ظہوری 125
- مدینے دے ماہی سلام علیک عمر غنی 126
- سلام آقا زباں تے جاری سلام کہناں عمر غنی 127
- ہر دم پڑھو درود بیلو دم دم کہو سلام الصلوٰۃ والسلام عمر غنی 128
- روون آساں تے سدھراں چیکن سلام آقا عمر غنی 129
- رحمت دو جہاں تے ہزاراں سلام قاری غلام زبیر نازش 130
- نبی دی صفناں کریندی ہوئی ڈاکٹر غلام شبیر رانا 131
- محمد دوارے سلام آکھدے نیں غلام مصطفیٰ طالب 133
- مصطفیٰ تے پڑھو درود و سلام فیض رسول فیضان 134
- آفتاب رسالت تے لکھاں سلام قمر یزدانی 135
- لباں تے تساں داناں ہووے کاشف کھیل کاشف 136
- حضور اکرم دی ہر ادا تے سلام آکھو کلیم شہزاد 137
- خدائی نور تے عرشاں دے تارے معراج انصاری 138
- رحمت رب دا وسدا ابر بہار صلوٰۃ سلاماں سید منصور خالد 139
- پیامبر جو اجالیاں دا سلام اوہنوں منظور وزیر آبادی 141
- کل انبیاء دے سردار نوں سلام ہووے ڈاکٹر محمد دین شاہد 142
- سید ابراہان نوں لکھاں سلام ہاجر مشکور ناصری 143
- خاتم الانبیاء تے ہزاراں سلام شاعر نامعلوم 144



## درود و سلام دی روایت

پنجابی وچ درود و سلام دی روایت کئی کو پرانی اے؟ ایہدے بارے کوئی ٹھکویں گل تے نہیں  
 کہتی جاسکدی البتہ ایہ ضرور کہیا جاسکدا اے ایہ روایت یقیناً اوئی ای پرانی اے جتی پنجابی زبان۔  
 پنجابی زبان نوں ساڈے صوفیاں نے اسلام پھیلان واسطے لوکاں نوں اوہناں دی زبان وچ دین  
 سکھان واسطے استعمال کیتا۔ ایس لئی جتی کو پنجابی نعت دی روایت پرانی اے ایہی کو درود و سلام دی  
 روایت وی پرانی ہو سکدی اے۔ نعت دیاں محفلاں وچ آخرتے درود و سلام کھڑے ہو کے پڑھیا جاندا  
 اے۔

میں اپنے بچپن وچ ایہ درود پڑھدیاں اکثر لوکاں نوں سنیا سی

صل علیٰ مینا صل علیٰ محمد

صل علیٰ شفیعنا صل علیٰ محمد

آ کر فرشتے نور دے روئے تے پڑھن حضور دے

کیوں نہ پڑھاں میں دل لگا صل علیٰ محمد

صل علیٰ مینا صل علیٰ محمد

صل علیٰ شفیعنا صل علیٰ محمد

انج ای کلمے دا ذکر بہت پڑھیا جاندا سی تے اج وی پڑھیا جاندا اے پر لوکاں اوہدے وچ

اپنی مرضی مطابق مصرعے رلا رلا کے اوہنوں لوک ادب ای بنا جھڈیا تے جس شاعر نے لکھیا سی اوہ پچھے

لک گیا جیویں کہ



ایہ کلمہ نور و نور میاں

سانوں دیا شاہ شکور میاں

اسیں پڑھنا ہے ضرور میاں

پڑھو لا الہ الا اللہ

گڈی آئی اے شہر و شہر میاں

وچ بیٹھے نیں شاہ مہر میاں

اتھے لگدی نہیں کوئی دیر میاں

پڑھو لا الہ الا اللہ

ایہ کلمہ اے اک راز میاں

سانوں دیا پیر اعجاز میاں

ایہ دل نوں کرے گداز میاں

پڑھو لا الہ الا اللہ

اسیں اک داری پچھے نظر مارنے آں کہ ایہ محفل میلاد کدوں شروع ہوئی تے فیر درود و سلام

دی روایت کتھوں چلی

پہلی گل ایہ ذہن وچ رکھنی چاہی دی اے کہ ایس ویلے پوری دنیا دے مسلماناں وچ محفل

میلاد و اجیہ طریقہ اے ایہدا مقصد اللہ تے اوہدے حبیب ﷺ دا ذکر پاک سنن واسطے اجتماع کرنا

اے تاں جو عام مسلماناں نوں فائدہ پہنچے۔ اللہ تے اللہ دے رسول ﷺ دی خوشنودی حاصل کیٹی

جاوے۔ ایہدے وچ حضور ﷺ دی مبارک زندگی دے حالات، فضائل، شمائل تے درجات قرآن



تے حدیث دی روشنی وچ دے جان دے نیں۔ آپ ﷺ اگے عرضاں کیتیاں جاندیاں نیں۔  
 انفرادی تے اجتماعی بھلائی دیاں دعاواں کیتیاں جاندیاں نیں۔ آپ ﷺ دی ولادت مبارکہ تے اللہ  
 تعالیٰ نے جیہڑے عجائب دکھائے اوہناں دا ذکر ہندا اے۔ لوکاں دے دلاں وچ حضور ﷺ دی  
 محبت پیدا کیتی جاندی اے تے آخرتے صلوٰۃ و سلام پڑھیا جاند اے۔

سب توں پہلی محفل میلاد خود اللہ تعالیٰ نے منعقد کیتی۔ ارشاد باری تعالیٰ اے۔ ترجمہ ”تے  
 یاد کر (اوہ ویلا) جدوں اللہ تعالیٰ نے پیغمبراں توں عہد لیا کہ میں تہانوں کتاب تے حکمت دیواں فیر  
 تشریف لے آدے تہاڈے کول اوہ رسول جیہڑا تصدیق کرے تہاڈیاں کتاباں دی تے تسیں ضرور  
 ضرور اوہدے تے ایمان لے آونا تے ضرور ضرور اوہدی مدد کرنا۔ کیوں تساں اقرار کیتا تے بھاری ذمہ  
 لیا۔ ساریاں نے عرض کیتا کہ اسیں اقرار کیتا تے فرمایا گواہ ہو جاؤ اک دو جے تے۔

ایہدے توں ثابت ہو یا کہ ذکر رسول ﷺ واسطے اجتماع کرنا سنت الہیہ اے۔

اللہ تعالیٰ نے فرمایا ”ان الله وملئكتہ يصلون علی النبی یا  
 یہا الذین امنوا صلوا علیہ وسلمو تسلیما“ (ترجمہ) بے شک اللہ تے  
 اوہدے فرشتے درود بھیج دے نیں اوس غیب دین والے نبی تے اے ایمان والیو (تسیں وی) اوہناں  
 تے درود بھیجوتے خوب سلام بھیجو۔

(سورۃ الاحزاب آیت نمبر 56 پارہ نمبر 22 رکوع 4)

اک ہور تھاں تے فرمایا ”ورفعنا لک ذکرک“ اور اسیں تہاڈی خوشی لئی  
 تہاڈا ذکر بلند کیتا۔

(سورۃ الم نشرح آیت نمبر ۴)

قل بفضل اللہ وبرحمته فبذلک فلیفرحو

خیر مما یجمعون۔ (سورۃ یونس آیت نمبر ۵۸) (ترجمہ)۔ اے محبوب ﷺ فرما

دیکھو کہ اللہ دے فضل تے اوہدی رحمت تے چاہیدا اے کہ خوشی مناؤ۔ اور ایس تے خرچ کرو ایہ خرچ کرنا اس دے نالوں افضل اے جیہڑا بچا کے رکھیا جائدا اے۔

سورۃ یونس دی ایس آیت نوں سامنے رکھے تے پتا چلدا اے پئی محفل میلاد منعقد کرنا یا جشن ولادت منانا اللہ دا حکم اے تے ایس حکم نوں بجا لیا ونا ای اللہ تے اللہ دے رسول ﷺ دی خوشنودی حاصل کرنا اے۔ جدوں خوشی حاصل ہووے تے خوشی نہ کرنا کفرانِ نعمت اے۔

**واما بنعمة ربك فحدث "اور اپنے رب کی نعمت کا خوب چہ چا کرو"**

حضور ﷺ دا تشریف لیا نا سب توں وڈی نعمت اے تے ایہدا چہ چا کرن دا سب توں بہترین طریقہ محفل میلاد منعقد کرنا اے۔

ایہ تے حکم میلاد اے۔ آؤ دیکھیے ایہدے تے عمل کدوں شروع ہو یا۔ حضور ﷺ نے ۶۱۰ء وچ اعلان نبوت فرمایا تے نال ای آپ نے اپنا عقیقہ کیتا یعنی اپنی ولادت دا جشن منایا۔ منبر تے کھڑے ہو کے اپنا حسب نسب بیان کیتا۔

بعض صحابہ کرام نوں حکم دتا کہ اوہ ذکر ولادت کرن تے آپ ﷺ دے فضائل بیان کرن تے آپ ﷺ نے خود سماعت فرمائے۔

دربار رسالت مآب وچ کئی صحابہ کرام نے نعتیہ قصیدے پیش کیے۔ آپ ﷺ خوش ہوئے تے دعاواں دتیاں۔

۹ھ نوں جنگ تبوک توں واپسی تے مدینہ منورہ وچ آپ ﷺ تشریف فرما سن جے آپ دے چچا حضرت عباسؓ حاضر تے ذکر ولادت دی اجازت منگی۔ اجازت ملن تے بڑی سترنم آواز وچ لہک لہک کے خوشی خوشی مولود نامہ پیش کیتا۔ ایہ پہلا ذکر ولادت سی جیہڑا دربار رسالت مآب ﷺ وچ پیش کیتا گیا۔ (مولد رسول از علامہ ابن کثیر)

حضرت علی کرم اللہ وجہہ نے وی آپ دا ذکر ولادت تے فضائل بیان کیے نیں۔



در بار نبوی ﷺ وچ میلاد یہ قصیدے پڑھن والیاں وچ ایہ حضرات شامل سن۔

حضرت ابوطالبؓ، حضرت عباسؓ، حضرت کعب بن زہیرؓ، حضرت حسان بن ثابتؓ، حضرت عبداللہ بن رواحہؓ، حضرت کعب بن مالکؓ، حضرت عباس بن مرداس۔

(اردو میں میلاد النبی ﷺ۔ محمد مظفر عالم جاوید صدیقی)

ہولی ہولی ایہ سلسلہ ودھ دا گیا تے باقاعدہ محفل میلاد دوی شکل اختیار کر دا گیا۔ خلفائے راشدین تے تابعین تے تبع تابعین نے لہنوں نظم چ لیا ندا۔ تہجی صدی ہجری تک محفل میلاد نظم و ضبط چ آچکی سی۔ (سبل الہدیٰ والرشاد فی سیرت خیر العباد)

اک متقی شخص عمر بن ملا محمد موصی علیہ الرحمہ نے لہنوں باضابطہ قائم کیتا۔ اوہناں دی پیروی وچ سلطان صلاح الدین ایوبی دے عزیز سلطان اربل ملک ابوسعید مظفر الدین نے ستویں صدی ہجری وچ جشن عید میلاد النبی سرکاری سطح تے منایا۔ تاریخ مرآۃ الزمان دے مطابق ایس جشن تے لکھاں روپے خرچ کیتے جاندے سن۔ (محمد رسول اللہ ﷺ۔ علامہ محمد رضا مصری)

سلطان اربل توں اڈ ہو روی بادشاہ محفل میلاد النبی مناندے رہے نیں۔ جیویں کہ شاہ مصر ایہ جشن منانداسی۔ علامہ ابن جزری ایہدا اکھیں ڈٹھا حال لکھدے ہوئے کہندے نیں کہ ایس جشن وچ اک ہزار مثقال سونا خرچ کیتا جانداسی۔

سلطان ابوحمو موسیٰ تلمسانی تے اندلس دے سلاطین جشن عید میلاد النبی مناندے رہے نیں۔ ایس جشن دی تفصیل ابو عبد اللہ تونسلی ثم تلمسانی نے اپنی کتاب راح الارواح وچ لکھی اے۔

اٹھویں صدی ہجری وچ جلیل القدر عالم امام تقی الدین سبکی شافعی رحمۃ اللہ علیہ دی خدمت وچ علمائے وقت حاضر سن۔ مجلس لگی سی۔ مجلس وچ عالم ای عالم سن۔ کسے عالم نے ایس مجلس وچ امام صرصری رحمۃ اللہ علیہ دے نعتیہ شعر پڑھے۔ امام صرصری اوہ ہستی اے جیہدے بارے علامہ محمد بن یوسف شافعی نے حسان وقت تے حضور ﷺ دا عاشق صادق آکھیا اے۔ جدوں ایس محفل چ اوہناں دا ایہ شعر پڑھیا گیا۔

ترجہ روضہ عنہما آں آں رواں لا حضور ﷺ واذ کہ جمیل اسرار۔ کہ صفایاں بنہر کے کھلو

جان دے نیں یاد و زانو ہو جان دے نیں۔

ایہ شعر سننا سی کہ اچانک امام تقی الدین سبکی تے اوہناں دے نال نال سارے ای عالم کھڑے ہو گئے۔

اوہ کیہ کھڑے ہوئے اوہناں دے نال سارا عالم کھڑا ہو گیا۔ پوری دنیا اٹھ کے کھلو گئی۔ اللہ تعالیٰ جدوں اپنے محبوب دی کے ادا نوں پسند فرما ندا اے تاں اوہنوں عام کر دیندا اے آج عالم اسلام وچ محفل میلاد النبی ﷺ وچ سلام کھڑے ہو کے پڑھنا اوہناں دی یادگار اے۔ حقیقت تے ایہ دے کہ ایہ فرشتیاں دی سنت اے جیہدے تے امام تقی الدین سبکی علیہ رحمہ نے عمل کیتا۔ قرآن کریم وچ ارشاد اے۔

بے شک اللہ تے اوہدے فرشتے نبی ﷺ تے درود بھیج دے نیں۔

(سورۃ احزاب آیت نمبر ۵۶)

دوجی تھاں تے اللہ تعالیٰ ایہناں درود گھلن والیاں دی قسم کھاندیاں ہو یاں ارشاد فرمایا اے۔ ترجمہ۔ ایہناں صف بنھ کے (کھلوتیاں) فرشتیاں دی قسم ایہ کھڑے ہو کے درود و سلام پڑھن دا سلسلہ شروع ہو یا تے جتھے جتھے وی اسلام دی روشنی گئی اوتھوں اوتھوں دیاں مقامی بولیاں وچ وی درود و سلام لکھے گئے۔ اردو وچ اعلیٰ حضرت تاجدار بریلی دے لکھے ہوئے سلام

مصطفیٰ جانِ رحمت پہ لاکھوں سلام

شمعِ بزمِ ہدایت پہ لاکھوں سلام

نوں بہت شہرت ملی۔ پنجابی وچ امیر صابری دا سلام۔

صبا در مصطفیٰ ﷺ تے جا کے کہویں درود و سلام میرا

نبی ﷺ دے قدماں تے سرنوں جھکا کے کہویں درود و سلام میرا

بہت مشہور ہو یا اوہدے توں بعد محمد علی ظہوری دے سلام نے واوانا مناکھی۔



پنجابی وچ سلام تے بھت لکھے گئے پر ایس کم نوں اکٹھا کرن ول توجہ نہیں دتی گئی۔ پہلی واری ماہنامہ لکھاری دے نعت نمبر 6 وچ خاصی تعداد وچ درود و سلام اک تھاں پتے اکٹھے کیے گئے نیں۔ ہن ایہ کتاب ”دروداں دے گجرے سلا ماں دے پھل“ دی صورت وچ تہاڈے ہتھاں وچ اے۔ میں ایہ تے نہیں کہواں گا کہ پنجابی دے درود و سلام اک تھاں اکٹھے ہو گئے نیں۔ پنجابی وچ جناں سلام لکھیا گیا اے ایہ تے اوہد عشر عشر وی نہیں۔ ایہ تے بارش دا پہلا قطرہ اے۔ اک نکی جہی کاوش اے۔ حضور ﷺ قبول فرمالین تے مینوں نعتیہ ادب تے ہور کم کرن دی توفیق عطا فرمان آمین ثم آمین۔

میاں محمد اقبال زخمی  
بانی بزم غلامانِ مصطفیٰ ﷺ  
جیا موسیٰ شاہد رہ لاہور



دروداں

دے

گجرے



## درود و سلام دی مہر

قدر و قیمت رکھدی رب دنی بارگاہ وچ کملی والے محمد دے نام دی مہر  
 ہر دعا اوہ اللہ منظور کردا جس تے لگ جاندی خیرالانام دی مہر  
 حب مصطفیٰ ای دنیا عقیبی اندر کملی والے دے ہر اک غلام دی مہر  
 رایگاں جاندی نہیں اوہ دعا حافظ جس تے لگ جاندی درود و سلام دی مہر

حافظ محمد حسین حافظ

ﷺ

عرشاں دے مختار محمد صلی اللہ علیہ وسلم  
نبیاں دے سردار محمد صلی اللہ علیہ وسلم

جد دا طوق غلامی پایا مینوں فکر نہ کوئی  
دیون کم سنوار محمد صلی اللہ علیہ وسلم

رب دا نور دکھالی دتا رل کے قدسی بولے  
قدرت دے شاہکار محمد صلی اللہ علیہ وسلم

اکور درتے مان ہے مینوں اکوتھاں توں سنگناں  
ازلون ہاں حب دار محمد صلی اللہ علیہ وسلم

مول نہ چنتا حشر دی مینوں ڈر کاہدا میں کرنا  
آتش دے غمخوار محمد صلی اللہ علیہ وسلم

آتش کیانی



صلی اللہ  
علیہ وسلم

دو جگ دے مختار محمد صلی اللہ علیہ وسلم  
 اللہ دے دلدار محمد صلی اللہ علیہ وسلم  
 نور چوں نور نوں وکھرا کر کے آپے اپنا درشن کر کے  
 گھڑیا سوہنا یار محمد صلی اللہ علیہ وسلم  
 سمھناں لئی بن رحمت آئے حبشی ورگے سینے لائے  
 امت دے غمخوار محمد صلی اللہ علیہ وسلم  
 یوسف ورگے وی شرمادون مل اپنا اک ائی پاون  
 قدرت دے شاہکار محمد صلی اللہ علیہ وسلم  
 بھلیاں تائیں راہ دکھلاون دکھیاں دے پے درد وٹھاون  
 کردے سوئی کار محمد صلی اللہ علیہ وسلم  
 شام سویرے کرن پنچھاور لوک درود سلام دے گجرے  
 میں ہنجوواں دے ہار محمد صلی اللہ علیہ وسلم  
 ملاں کر کر تھکے واعظ پلے دے وچ گن نہیں شاہد  
 میں ہاں بس حب دار محمد صلی اللہ علیہ وسلم

ارشاد شاہد

## صلی اللہ علیہ وسلم

دل میرا جے تھاں تساڈا صلی اللہ علیک وسلم  
 میری دولت ناں تساڈا صلی اللہ علیک وسلم  
 پنکرے جے کر آس دی ڈالی روضے دی میں چماں جالی  
 ویکھاں جا گراں تساڈا صلی اللہ علیک وسلم  
 کوثر جس ویلے ورتائیو اس عاجز نوں بھل نہ جانیو  
 میں وی خادم ہاں تساڈا صلی اللہ علیک وسلم  
 ملک قبر دے وچ جاں آون دین میرے دی گل ہلاون  
 ناں اودوں وی لاں تساڈا صلی اللہ علیک وسلم  
 حشر دے وچ جاں پھڑیا جاواں اپنے عمیں کڑیا جاواں  
 اوتھے میلا پاں تساڈا صلی اللہ علیک وسلم  
 سنگ اسود دا پیا جاں جھیرا ہور کوئی انج نہیڑا کیہڑا  
 سوہنا ستھرا نیاں تساڈا صلی علی اللہ علیک وسلم  
 ہووے کدی ایہ شوق نہ مدھم وانگ اسحق دے میں وی ہر دم  
 منگل گاؤندا رہاں تساڈا صلی اللہ علیک وسلم  
 سیٹھا اسحق



صلی اللہ  
علیہ وسلم

عرشاں دا مہمان محمد صل اللہ علیہ وسلم  
وو عالم دی جان محمد صل اللہ علیہ وسلم  
در محبوب دا مل کے کہندے  
عاشق سارے رل کے کہندے  
ساڈا تے ایمان محمد صل اللہ علیہ وسلم  
غاراں وچ جا کے لک لک کے  
رب اگے روئے جھک جھک کے  
امت لئی ہر آن محمد صل اللہ علیہ وسلم  
سدرہ توں وی اگے جا کے  
رب اپنے دے درشن پا کے  
پائی اچی شان محمد صل اللہ علیہ وسلم  
سدھی راہ تے پاون والا  
عرشاں اتوں آون والا  
دے گیا اے قرآن محمد صل اللہ علیہ وسلم

اسلم شوق

.....☆☆.....

صلی اللہ  
علیہ وسلم

آپ دے عشق وچ اتھرو چھم چھم، اکھوں وڑھدے رشک زمزم  
ورھدے رہو وائے بنجو جم جم پڑھدے رہو وائے اشکو دم دم صلی اللہ علیہ وسلم  
رب دے پیارے سب دے رہبر، جگ دے محسن، ہادی، سرور  
وہ سلطانوں آپ دانوکر، ٹھلدا آپ دا ہر تھاں پرچم صلی اللہ علیہ وسلم  
غاراں دے وچ روون والے، زنگ دلاں دا دھوون والے  
ہردے عیب لکوون والے، اک اک بول غماں دا مرہم صلی اللہ علیہ وسلم  
اوہناں ورگا سوہنا کوئی نہیں، عرش دا ہور پروہنا کوئی نہیں  
اوہناں ورگا ہونا کوئی نہیں، رب دے بعد نیں سبھ توں اعظم صلی اللہ علیہ وسلم  
جد بیٹی نوں ماں نہ سیانو، باپ نہ بیٹے دا ہوو جانو  
یار نہ کوئی یار پچھانو، تداوہ حشر چ آون گے کم صلی اللہ علیہ وسلم  
میںوں آپ بچا لوو آقا، کملی بیٹھ لکا لوو آقا  
رب نوں آپ منا لوو آقا، آپ دی شان شفاعت محکم صلی اللہ علیہ وسلم  
اوہناں دی ہر چیز اے پھیدی، نال اوہناں دے عزت سب دی  
انور عاصی دا سونہہ ربدی، دین ایمان رسول اکرم صلی اللہ علیہ وسلم  
پروفیسر افضال انور



صلی اللہ  
علیہ وسلم

تیری ذات مثالی آقا  
تیری شان کمالی آقا  
رتے تیرے عالی آقا  
دن سایا توں بن کے آیا  
سارے جگ تے تیرا سایا  
سب نوں کملی ہٹھ لکایا  
توں ہمدرد یتیمیاں دا ایں  
توں لہجپال غریباں دا ایں  
آسرا توں بے آساں دا ایں  
پاکستان تے کرم کما دے  
ڈولدی بیڑی بنے لا دے  
بد نظراں توں لہنوں بچا دے  
میں تے دیندی پھراں دہانیاں  
در تیرے توں آساں لائیاں  
میتھے کرم کماویں سائیاں  
زخمی روز مدینے ہوواں  
روز موابے کول کھلوواں  
جالیاں نوں میں چم چم روواں  
صلی اللہ علیہ وسلم  
میاں اقبال زخمی

صلی اللہ  
علیہ وسلم

خدا ولوں پکار آئے پڑھو صل علی سارے  
دل و جاں نوں قرار آئے پڑھو صل علی سارے  
کلی دلدی کھڑے گی جد مدینے دی ہوا آئے  
خزاں جاوے بہار آئے پڑھو صل علی سارے  
جدوں میرے لبیاں توں ناں ادا ہووے محمد دا  
خدا نوں وی پیار آئے پڑھو صل علی سارے  
اسیں پیاسے آل سارے دیدوے طیبہ چلو چلے  
طلب وچ کجھ نکھار آئے پڑھو صل علی سارے  
کھلاری لے اساں نعتاں دی خشبوتے فرشتے وی  
قطار اندر قطار آئے پڑھو صل علی سارے  
اساڈا تے سہارا شفیع المذنبین آقا  
شفاعت دی پھہار آئے پڑھو صل علی سارے

اقبال نجمی



## صلی اللہ علیہ وسلم

میں وی تیرے در تے آواں صلی اللہ علیک وسلم  
 گیت تیری عظمت دے گاواں صلی اللہ علیک وسلم  
 دو جگ اتے تیری شاہی دیندا اے قرآن گواہی  
 سب توں اچا تیرا ناواں صلی اللہ علیک وسلم  
 رب دا توں محبوب پیارا دکھیاں دے دکھ درد دا چارا  
 دکھیاں نوں توں دیویں پناہواں صلی اللہ علیک وسلم  
 رحمت کل جہاناں لئی توں دھرتی تے اسماناں لئی توں  
 دو جگ اتے تیریاں چھاواں صلی اللہ علیک وسلم  
 جے کر سوہنیا! توں نہ آؤندا چیز کوئی نہ رب بناؤندا  
 نال تیرے تے وسدیاں ساہواں صلی اللہ علیک وسلم  
 شاہد تے مشہود وی توں ایں حامد تے محمود وی توں ایں  
 ہر دل دیوچ تیریاں تھاواں صلی اللہ علیک وسلم  
 عرشاں اتے کول بلا کئے سامنے تینوں پھیر بٹھا کے  
 لبھدا تیریاں رب رضاواں صلی اللہ علیک وسلم  
 تیری اطاعت رب دی اطاعت تیری زیارت رب دی زیارت  
 جی کردا تینوں ویکھی جاواں صلی اللہ علیک وسلم  
 لکھ دے لیکھاں وچ مدینہ آساں دا کر پار سفینہ  
 چنگیاں ہور نہ لگدیاں تھاواں صلی اللہ علیک وسلم  
 انھرنوں وی سد مدینے ہجر دے بھانبر بلدے سینے  
 تڑپاں روواں تے کرولاں صلی اللہ علیک وسلم  
 انصر عقیل حیدری

## صلی اللہ علیہ وسلم

قدرت دے شہکار محمد ﷺ دو جگ دے سردار محمد ﷺ  
ہر اک دے غمخوار محمد صلی اللہ علیہ وسلم  
اجڑی پئی سی کل خدائی اوہ آئے تے رونق آئی  
انساناں نے عید منائی صلی اللہ علیہ وسلم  
سن جیہڑے بے انکھ ٹلجے بن گئے سوہنے اتے سچے  
کملے کملی پیٹھاں کجے صلی اللہ علیہ وسلم  
نسیا کفر تے کوڑ مکالا ہويا چار چھیر اجالا  
آیا نوری مکھڑے والا صلی اللہ علیہ وسلم  
خالی گئے نہ در تے آئے اوہدے منگتے شاہ سداے  
اوہدے فیض نین دون سوائے صلی اللہ علیہ وسلم  
ہر انسان اے آدم جایا کیمڑا اپنا کون پرایا  
اوہ کل عالم دے کم آیا صلی اللہ علیہ وسلم  
ونڈیا اوہنے پیار خزانہ موہ لیا اوہنے کل زمانہ  
میں تنویر اوہدا دیوانہ صلی اللہ علیہ وسلم

تنویر بخاری



## صلی اللہ علیہ وسلم

جسم مطہر شان منزل صلی اللہ علیہ وسلم    کامل اکمل ذات مکمل صلی اللہ علیہ وسلم  
 ساڈے عیب لکاؤں کارن    موہڈے بجیا کالا مکمل صلی اللہ علیہ وسلم  
 ہادی رہبر آگو لیڈر    رب پکاریا آکھ مدثر  
 اوہدیاں شاناں اللہ اکبر    انا اعطینک الکوثر صلی اللہ علیہ وسلم  
 جھگی محل منارے آکھن    سورج چن ستارے آکھن  
 حدوں ودھ کنارے آکھن    بے شک تہیہ سپارے آکھن  
 صلی اللہ علیہ وسلم  
 ستے امبر ست    زمیناں آکھن ایہو ست مہیناں  
 خلق اخلاق تے موہ محبت    پریم پریت پیار مروت  
 ایہناں ناویاں دا سرناواں    جس تھیں گڑھتی دیندیاں ماواں  
 الف نے میم دا روپ وٹایا    احد آپے احمد بن آیا  
 پیر فقیر دی کل کماٹی    غوث قطب نوں بخشے شاہی  
 عزتاں والا اسم محمد ﷺ    آناں والا اسم محمد ﷺ  
 ایسے ناں توں جاگاں لگن    ایسے ناں توں فجراں پھٹن  
 ایسے ناں توں انہریں لالی    رب لوڑیندا سکھ دکھالی  
 ورد وظیفے کوئی ککارے    دم ہم دم حسن پکارے  
 صلی اللہ علیہ وسلم    صلی اللہ علیہ وسلم  
 پروفیسر حسن ملک

## صلی اللہ علیہ وسلم

نبی ﷺ خود آپ وی سوہنا نبی ﷺ دے یار وی چارے  
ہمیرے وچ لو بخش نبی ﷺ دے یار چن تارے  
عقیدت نال خیاں زاہد مارو حیدری نعرے  
پڑھو صل علی سارے پڑھو صل علی سارے

مرے آقا دے آون دا جشن سجناں منایا اے  
گلی بازار اس دل دے محلے نوں سجایا اے  
بڑے بج بن کے آئے نیں پروہنے میرے آقا دے  
کیویں سرکار مدنی توں پئے جاندے نیں ایہ وارے  
پڑھو صل علی سارے پڑھو صل علی سارے

بڑے خوش بخت نیں جیہڑے پئے محفل نوں سجا دے نیں  
خدا اوہناں توں خوش ہووے نبی ﷺ دا پیار پاندے نیں  
کسے خوفوں وی نہیں ڈر دے میرے آقا دے پروانے  
خشی دے نال انج چمکن جیویں چمکن پئے تارے  
پڑھو صل علی سارے پڑھو صل علی سارے

مرا زاہد عقیدہ اے اتھے آقا وی آون گے  
صارو جھولیاں بیٹھو ہتھیں خیرات پاون گے  
مرے آقا دے آون دی گھڑی نزدیک ہے سجنو!  
جھکا کے بیٹھو نظراں نوں میرے آقا دے درپاں  
پڑھو صل علی سارے پڑھو صل علی سارے

صلی اللہ علیہ وسلم

اکھ دا چائن دلدی . دھڑکن صلی اللہ علیہ وسلم  
میریاں سب سوچاں دا مسکن صلی اللہ علیہ وسلم

ساہنویں شہر مدینہ ہووے ٹھنڈا میرا سینہ ہووے  
چھم چھم چھم اکھیاں برن صلی اللہ علیہ وسلم

ہر اک شے ای تیرے سوہنے ناں دا ورد کماندی اتھے  
کوئل کوکے چڑیاں چمکن صلی اللہ علیہ وسلم

سبھ چائن اعجاز نبی دا جن دھرتی تے وگا آکے  
ہتھاں دے وچ کنکر آکھن صلی اللہ علیہ وسلم

عزت کل جہانے ہووے اکھر ورد زبانی ہووے  
صوفی لیکھ کوں نہ چمکن صلی اللہ علیہ وسلم

حنیف صوفی



## صلو علیہ والہ

جے نہ آؤندے جگ تے مرے نبی تے نہ ملدا سانوں خدا کدی

صلو علیہ وآلہ

سمھے رونقاں آپ دے دم دیاں تے عطاواں ہین کرم دیاں

چن تارے سارے غلام اوہدے ہراک تے فیض نہیں عام اوہدے

صلو علیہ وآلہ

جگاں دے اوہ سردار نہیں نبیاں دے اوہ سالار نہیں

اوہناں دا نور قدیم اے پہلوں الف پھر میم اے

صلو علیہ والہ

جبریل سدرہ تے رک گئے سب زور اوس دے مک گئے

رف رف وی ہف کے تھک گیا کوئی نہ اتے تک گیا

صلو علیہ وآلہ

تنہا گئے ساڈے نبی مڑھکے تھیں راہواں مہکیاں

انگلاں تھیں چشمے پھوڈے پی پی صحابہ رج گئے

صلو علیہ وآلہ

دنداں چوں نکلے روشنی سرکار دا رتبہ سنو

عرفات دا خطبہ سنو پہلا اوہو دستور اے

صلو علیہ وآلہ

اوسے دی اے سب چاننی یا سیدی یا مصطفیٰ

اے خلق دے حاجت روا محشر دے وچ خیر البشر

صلو علیہ وآلہ

نازش تے وی کرنا کرم تاہنگاں شفاعت آپ دی

صلی اللہ علیہ وسلم

نوری تیرے نوکر چاکر ، صلی اللہ علیہ وسلم  
امتی تیرے سب پیغمبر ، صلی اللہ علیہ وسلم

تیرے در دی شان نرالی گنبد سبز سنہری جالی  
کہوے تے دوے سلامی انبر صلی اللہ علیہ وسلم

سورج چن ستارے سارے منگتے بن دے ترے دوارے  
جگ دے حاتم ترے گداگر ، صلی اللہ علیہ وسلم

کرے وی کھڑا مدحت خوانی جبرائیل کرے دربانی  
تیرے بروے جگ دے افسر ، صلی اللہ علیہ وسلم

موڈھے اتے کملی پھبے نور برسدا سجے کھبے  
ذکر ابے تیرا چین سراسر صلی اللہ علیہ وسلم

نت نازش تے کرم کمائیں مینوں خیر جنابوں پائیں  
تیرا قطرہ مرا سمندر ، صلی اللہ علیہ وسلم  
محمد حنیف نازش قادری

ﷺ

مٹھری مٹھری آپ ﷺ دی بولی، صلی اللہ علیہ وسلم  
جندڑی پاک نبی ﷺ توں گھولی، صلی اللہ علیہ وسلم

آؤ سارے رل مل بہے پاک نبی ﷺ دیاں نعتاں کہے  
نالے آکھے سب ہجولی، صلی اللہ علیہ وسلم

صورت آپ دی پیاری پیاری سیرت آپ دی نیاری نیاری  
گفتگو آپ دی بھولی بھولی، صلی اللہ علیہ وسلم

ہر اک دا دکھ وٹن والے ملے دلاں نوں گنڈھن والے  
کیوں نہ پڑھئے بن کے ٹولی، صلی اللہ علیہ وسلم

سعدیہ دی لکھاں دی کلی وچ پائی برکت ان ملی  
رحمت آپ دی ہے ان توی، صلی اللہ علیہ وسلم

نازش جو آوے لے جاوے مونہوں منگیا مقصد پاوے  
بھردے آپ نہیں نسب دی جھولی، صلی اللہ علیہ وسلم  
محمد حنیف نازش قادری



صلی اللہ علیہ وسلم

میری جنت تے جان محمد صلی اللہ علیہ وسلم  
میرا اے ایمان محمد صلی اللہ علیہ وسلم

تیرے ناں ناں ناں ناں ایں میرا  
میری اے پہچان محمد صلی اللہ علیہ وسلم  
میرے جیسے نوں گل ناں لاویں  
تیری اپی شان محمد صلی اللہ علیہ وسلم

میرے دل وچ چائن تیرا  
المصباح نشان محمد صلی اللہ علیہ وسلم  
نور و نور نہیں دوویں عالم  
رب اے مدح خوان محمد صلی اللہ علیہ وسلم

پیار تیرے وچ عالم خلقے  
لولاک الما اے شان محمد صلی اللہ علیہ وسلم  
سب سوہنیاں توں توں ایں سوہنا  
سوہنیاں دا سلطان محمد صلی اللہ علیہ وسلم

تیرے اتے لکھ صلوتاں  
رب دے پڑھن مہمان محمد صلی اللہ علیہ وسلم  
ساڈے جیسے فقیراں تائیں  
کملی پٹھ چھپان محمد صلی اللہ علیہ وسلم

تدھ بن سانوں کوئی نہ جھلے  
کملے کتھے جان محمد صلی اللہ علیہ وسلم

شب اسری اک قدم ایں تیرا  
 اوادنسی مہمان محمد صلی اللہ علیہ وسلم  
 قرآن دیاں آیتاں نال رکوع  
 تیری ثناء قرآن محمد صلی اللہ علیہ وسلم  
 سدا تیرا کدوں کو آوے  
 ویکھو کدوں بلان محمد صلی اللہ علیہ وسلم  
 طواف تیرا اے کعبہ کردا  
 کعبے دا کرن انسان محمد صلی اللہ علیہ وسلم  
 تیرے ناں نال جسدی نسبت  
 ناں دی لاج نبھان محمد صلی اللہ علیہ وسلم  
 ہتھ بدھے اسیں گولے تیرے  
 بھاویں جان نہ جان محمد صلی اللہ علیہ وسلم  
 ابوبکر فاروق الاعظم  
 اسد اللہ عثمان محمد صلی اللہ علیہ وسلم  
 چارے یار تے چارے کوٹاں  
 تیرے زیر فرمان محمد صلی اللہ علیہ وسلم  
 تیری آل دا ہند وچ چانن  
 سخر تے گیلان محمد صلی اللہ علیہ وسلم  
 تیرے ناں تے سر پئے دیندے  
 عاشقاں دا ایمان محمد صلی اللہ علیہ وسلم

تیرے چاکر دے اسیں چاکر  
 اسیں غلام غلامان محمد صلی اللہ علیہ وسلم  
 وجود تیرے نال دھرتی اچی  
 نیواں این اسمان محمد صلی اللہ علیہ وسلم  
 لکھاں فرشتے رب دے ولوں  
 تینوں سلام پوہنچان محمد صلی اللہ علیہ وسلم  
 تیرے تابع جن و انس میں  
 تابع زمیں اسمان محمد صلی اللہ علیہ وسلم  
 کلمہ حج نمازاں روزے  
 قدماں تے قربان محمد صلی اللہ علیہ وسلم  
 تیرے کرم تے رحم تے واری  
 تیرے میں احسان محمد صلی اللہ علیہ وسلم  
 میں جے لکھاں گولے راہ تے  
 جبرائیل دربان محمد صلی اللہ علیہ وسلم  
 کیہ کیہ تیریاں صفتاں لکھاں  
 یسین فرقان محمد صلی اللہ علیہ وسلم  
 خوف قبر دا نہ حشر دا  
 توں ای ایں نگہبان محمد صلی اللہ علیہ وسلم  
 ہتھ بدھے اسیں ترلا پائیے  
 ہجر توں چھٹے جان محمد صلی اللہ علیہ وسلم



تیں بن ساڈا ہور نہ کوئی  
 حشر دا توں سامان محمد صلی اللہ علیہ وسلم  
 ساڈی قوم کور ہے پے گئی  
 بچاؤ پاکستان محمد صلی اللہ علیہ وسلم  
 جناح بھلول نے بخشی جنت  
 کیتی اساں ویران محمد صلی اللہ علیہ وسلم  
 نظر غیبراں دی ساڈے اتے  
 لٹن ملک نوں آن محمد صلی اللہ علیہ وسلم  
 ملاں پیر تے واعظ رل کے  
 کردے نیں پریشان محمد صلی اللہ علیہ وسلم  
 قتل و غارت اے وچ مسیحاں  
 کتے نہ ملے امان محمد صلی اللہ علیہ وسلم  
 اٹھ باغاں دے راکھے بن گئے  
 روند اے باغبان محمد صلی اللہ علیہ وسلم  
 انھے بن گئے قوم دے رہبر  
 لے کے کتھے جان محمد صلی اللہ علیہ وسلم  
 اپنا بندہ دے دیو سانوں  
 مشکل کرو آسان محمد صلی اللہ علیہ وسلم  
 صدق و صفا نال آکھے صوفی  
 محمد دین دا ایمان محمد صلی اللہ علیہ وسلم  
 صوفی محمد دین چشتی نظامی

صلی اللہ  
علیہ وسلم

مونہہ کر کے پاک مدینے ول نت ورد پکاؤنا صلی اللہ  
پلکاں تے تیری فرقت فوج میں دیپ جلاؤنا صلی اللہ  
سوہنے دا اسم مبارک ای جند جان اے عاشقاں سچیاں دی  
لے لے کے نام محمد ﷺ دا ٹھنڈ سینے پاؤنا صلی اللہ  
رب جانے کبھڑی غلطی توں سرکار مدینے نہیں سدوے  
مونہہ نہیرے عرضاں رو رو کے میں روز سناؤنا صلی اللہ  
میری ہر مشکل دا اکو ای پرشد نے نسخہ دیا اے  
جد بھیڑ پوے ناں آقا دا لے کرلاؤنا صلی اللہ  
اس ویلے تیری رحمت ہی دیندی اے سہارا آکے تے  
جس ویلے کدھرے مشکل وچ میں ہاں گھبراؤنا صلی اللہ  
کر یاد مدینے والے نوں اکھ چھم چھم ورھدی جس ویلے  
لکھ نام محمد ﷺ دا ہتھ تے اکھیاں نوں لگاؤنا صلی اللہ  
ہادی نوں آقا در تیرے مجبوری آن نہ دیندی اے  
کئی کئی بہانے آون لئی ہر روز بناؤنا صلی اللہ  
الحاج محمد رشید ہادی

.....☆☆.....

## صلی اللہ علیہ وسلم

ورہیاں رحمتاں ولادت اے حضور دی سارے پڑھو صلِ علی  
 شمع بلی اے مدینے وچ نور دی سارے پڑھو صلِ علی  
 واراں جند سوہنے در یتیم توں جھلی گئی جیہدی تاب نہ کلیم توں  
 جلوہ میم دا تجلی ہے سی طور دی سارے پڑھو صلِ علی  
 شمع بلی اے مدینے وچ نور دی سارے پڑھو صلِ علی  
 نبی دیندے گئے جیہدیاں بشارتاں اج آ گیا اوہ کرلو زیارتاں  
 گل نیڑے ہو کے مک گئی دور دی سارے پڑھو صلِ علی  
 بدل رحمتاں تے برکتاں دے وس پئے پھل سکے ہوئے کھڑکھڑہس پئے  
 اک بجھ گئی کفر دے غرور دی سارے پڑھو صلِ علی  
 کنبے بت دل دھڑکیا شیطان دا سنیا نام جدوں محمد ﷺ عالی شان دا  
 جان ٹٹ گئی قہر تے فتور دی سارے پڑھو صلِ علی  
 حوراں تحفے وی درود دے لیاں نیں مائی آمنہ نوں دتیاں ودھائیاں نیں  
 پھیلی روشنی چوہیرے اوس نور دی سارے پڑھو صلِ علی  
 ساغر سوہنا اوہ سوغاتاں لیکے آیا اے گناہ گاراں لئی نجاتاں لیکے آیا اے  
 بیڑی پار ہو گئی امتاں دے پور دی سارے پڑھو صلِ علی  
 شمع بلی اے مدینے وچ نور دی سارے پڑھو صلِ علی  
 ساغرِ بیت



## صلی اللہ علیہ وسلم

صفتاں بھریا آپ دا ناں اے صلی اللہ علیہ وسلم  
 آپ دی رحمت ہر ہر تھاں اے صلی اللہ علیہ وسلم  
 حق دا اے جو نور مناراً رب نوں اے جو سب توں پیارا  
 اپنے پیارے ای دا گراں اے صلی اللہ علیہ وسلم  
 دل والے ایہ دین گواہی پاک نبی ﷺ دے فیضوں اج وی  
 طیبہ دا پرکھ سماں اے صلی اللہ علیہ وسلم  
 آدمؑ تھیں لے عیسیٰؑ تیکر ائے جنے وی پیغمبر  
 سبھ تھیں اچا آپ دا ناں اے صلی اللہ علیہ وسلم  
 کہتے نیں تاریخ نتارے سرور عالم ﷺ دے دربارے  
 جھکیا ہر اک آکڑ خاں اے صلی اللہ علیہ وسلم  
 آپ دے مونہوں جو گل نکلی اللہ سائیں پوری کیتی  
 آپ دی ہاں وچ اوہدی ہاں اے صلی اللہ علیہ وسلم  
 بے درداں دی تپدی جوہے ساقی اوکھہار دے مرتے  
 آپ دیاں فضلاں دی چھاں اے صلی اللہ علیہ وسلم

ساقی گجراتی

## صلی اللہ علیہ وسلم

دن رات پکی پڑھاں صل علی محمد  
 قربان میری جاں صل علی محمد  
 عرش نے وی چمے جوڑے حضور دے  
 کہیا رل فرشتیاں صل علی محمد  
 محشر نوں کتھے بہن گے پیارے مصطفیٰ  
 غریباں دے درمیاں صل علی محمد  
 جس نے پکاریا پہنچے حضور نے  
 مشکل ہوئی آساں صل علی محمد  
 خوش بخت کنی ہوواں مدینے دی خاک وچ  
 مل جائے مینوں تھاں صل علی محمد  
 رب دے فرشتے بھیج دے جس ذات تے درود  
 پھر کیوں نہ میں پڑھاں صل علی محمد  
 چوکھٹ اتے موت آوے سرور دی جستجو  
 پڑھ پڑھ کے میں مراں صل علی محمد

سرور رندھاوا

صلی اللہ  
علیہ وسلم

جد وی تیری نعت سناواں صلی اللہ علیہ وسلم  
مہکن کوئل کوئل ساہواں صلی اللہ علیہ وسلم

تیرا ذکر عبادت میری تیری نعت سعادت میری  
میریاں سوچاں دا سرناواں صلی اللہ علیہ وسلم

ہادی و رہبر دلبر توں ایں نالے شافع محشر توں ایں  
بول تیرے میں سینے لاواں صلی اللہ علیہ وسلم

میرا دین ایمان وی توں ایں مصحف تے قرآن وی توں ایں  
آکھاں ایہو وچ دعاواں صلی اللہ علیہ وسلم

انجم مرشد کامل میرا میتھوں رہندا دور ہنیرا  
روشن رکھے میریاں راہواں صلی اللہ علیہ وسلم  
شریف انجم



صلی اللہ  
علیہ وسلم

ذکر نبی ﷺ وا عالم عالم ..... صلی اللہ علیہ وسلم  
عشق نبی ﷺ وارحمت دم دم ..... صلی اللہ علیہ وسلم

فیض کرم دے چشمے جاری ڈھکدی درتے خلقت ساری  
اکمل افضل شان معظم ..... صلی اللہ علیہ وسلم

چن دو ٹکڑے نال اشارے شجر حجر وی خادم سارے  
جسم معطر ذات مکرم صلی ..... اللہ علیہ وسلم

صورت نوری چن شرماوے سیرت سوئی راہ دکھلاوے  
چانن چانن آپ دا ہر کم ..... صلی اللہ علیہ وسلم

ظلم جبر تے کفر مٹایا وحدت چاہت سبق پڑھایا  
مجبوراں دے سانجھی ہمد ..... صلی اللہ علیہ وسلم

ازل ابد دے نور جگینے علم خزینے عشق سفینے  
مہر محبت آب زم زم ..... صلی اللہ علیہ وسلم

ڈاکٹر شوکت علی قمر

صلی اللہ  
علیہ وسلم

پاک نبیؐ تے لکھ درود پاک نبیؐ تے لکھ درود  
بلکہ ہوں درود نبیؐ تے یارب لا محدود  
پاک نبیؐ تے لکھ درود پاک نبیؐ تے لکھ درود

پاک نبیؐ دے خادم سن جو بن گئے نہیں سلطان  
پاک نبیؐ دے دشمن ہو گئے دو جگ وچ ویران  
رب آقاؐ دے دشمن، تائیں کر دیندا نابود  
پاک نبیؐ تے لکھ درود پاک نبیؐ تے لکھ درود

عربی ڈھولے کولون اوہلے نہیں کوئی جگہ مقام  
ہر اک غائب نوں جانے صائم اللہ دا مہمان  
ناظر منظر سوہنا ہر تھاں حاضر تے موجود  
پاک نبیؐ تے لکھ درود پاک نبیؐ تے لکھ درود

صائم چشتی

.....☆☆.....

صلی اللہ  
عالیہ وسلم

اللہ پاک دے سوہنے دلبر صلی اللہ علیہ وسلم  
 سبھ توں افضل سبھ توں برتر صلی اللہ علیہ وسلم  
 مکے وچ ہوئیاں رشنائیاں 'حوراں آکے دین ودھائیاں  
 چمکیا اے چن آمنہ دے گھر صلی اللہ علیہ وسلم  
 نبیاں دی سرداری لے کئے دو جگ دی مختاری لے کے  
 آئے پاک محمد سرور صلی اللہ علیہ وسلم  
 کفر دے ہوئے دور ہمیرے چائن ہويا چار چھیرے  
 دنیا ساری ہوئی منور صلی اللہ علیہ وسلم  
 جسم وی طاہر روح وی طاہر 'پاک محمد اول آخر  
 رحمت والے خلق دے پیکر صلی اللہ علیہ وسلم  
 جہاں وی پتھر دین گواہی 'عرش علی دے اوہ نیں راہی  
 سبحان اللہ شان اطہر صلی اللہ علیہ وسلم  
 نبی دے باجھوں کتے نہ ڈھوئی نبی جہیا نہ ہادی کوئی  
 لین ہدایت وز قلندر صلی اللہ علیہ وسلم  
 عرشی فرشی کرن غلامی چن ستارے دین سلامی  
 ساریاں مخلوقاں دے رہبر صلی اللہ علیہ وسلم  
 صحرائی اوہ در تے بلاندے صحرائی اوہ کرم کماندے  
 صحرائی اوہ شافع محشر صلی اللہ علیہ وسلم  
 صحرائی گوروا سپوری



## صلی اللہ علیہ وسلم

اللہ اللہ تیری عظمت تیرے اتے ختم نبوت صلی اللہ علیہ وسلم  
 توں آیوں تے ہوئے سویرے مکے سارے کفر ہنیرے  
 چائن کھنڈیا چار چھیرے ساری تیرے نور دی برکت صلی اللہ علیہ وسلم  
 توں بھلیاں نوں رستے پایا پشواں نوں انسان بنایا  
 انساناں نوں رب ملایا کیتی ساری دور جہالت صلی اللہ علیہ وسلم  
 توں جد راز حقیقت کھولے خانے کعبے وچ بت ڈولے  
 مٹھی دے وچ کنکر بولے سچے رب دی دین شہادت صلی اللہ علیہ وسلم  
 وحدت والیاں پین پھوہاراں تیرے درتے رہن بہاراں  
 کھڑیاں نور دیاں گلزاراں پھل کلیاں وچ تیری نگہت صلی اللہ علیہ وسلم  
 سب نبیاں دا کامل رہبر آقا تیرا نہیں کوئی ہمسر  
 شافع محشر ساقیء کوثر رب دے جلوئے تیری صورت صلی اللہ علیہ وسلم  
 آقا تیرا نور الہی دین تیرا دستور الہی  
 قول تیرا منشور الہی تیری حشراں تیک قیادت صلی اللہ علیہ وسلم  
 جبرائیل پیغام لیایا آقا تینوں رب بلایا  
 تیرے لئی اج عرش سجایا رب نے کیتی تیری دعوت صلی اللہ علیہ وسلم  
 حل نوں خیر کرم دا پاویں ماڑے لسے گل نال لاویں  
 کالے گورے کیچے ساویں دو جگ دے لئی تیری رحمت صلی اللہ علیہ وسلم  
 ڈاکٹر صدیق حل

## صلی اللہ علیہ وسلم

رب دے پیارے حق دے دلارے آئے محمد صلی علی  
 کرن اشارے مست نظارے آئے محمد صلی علی  
 حوراں تے غلمان فرشتے آکھن جاگے بھاگ زمین دے  
 روشن ہوئیاں کوٹاں چارے آئے محمد صلی علی  
 بھاگاں بھریاں آئیاں گھڑیاں ہر تھاں لکیاں نوری جھڑیاں  
 مست فضاواں لین ہلارے آئے محمد صلی علی  
 گھر عبداللہ آمنہ جایا سوہنا احمد نام دھرایا  
 جائے حلیمہ صدقے وارے آئے محمد صلی علی  
 چن بدر دا مکھڑا نوری موڈھے اتے کالی بھوری  
 الا اللہ دے گونجے نعرے آئے محمد صلی علی  
 حال فقیری ٹھاٹھ شہانے ہر تھاں ونڈے خلق خزانے  
 کوٹ کفر دے ڈگ پئے سارے آئے محمد صلی علی  
 سوہنیاں شانناں رتبے عالی دو عالم دے آقا والی  
 عید مناون طالب سارے آئے محمد صلی علی  
 طالب چشتی

صلی اللہ  
علیہ وسلم

خود آپ آہندا اے خدا صلی علی صلی علی  
آکھو تسلیں وی بزملا صلی علی صلی علی

دنیا دی ہر اک چیز منگدی خیر اوہدی اے سدا  
لیندا جو نام اے آپ دا صلی علی صلی علی

ہو کے بڑے ای خوش میرے آقا مدینے والے نیں  
بخشی بوسیری نوں رواں صلی علی صلی علی

کیتی امامت سی جدوں بیت المقدس وچ حضور  
نبیاں نے مل کے آکھیا صلی علی صلی علی

والشمس چہرہ آپ دا کیتا تصور میں جدوں  
ہوٹھاں تے میرے آ گیا صلی علی صلی علی

محفل دروداں دی جی اوہ آگئے آقا مرے  
اہلاً و سہلاً مرجبا صلی علی صلی علی

میاں ظفر مقبول

ﷺ

مدینے دے والی دا سوہنا بیان ایں صل علی محمد  
 سارے پڑھو ایہ حکم قرآن ایں صل علی محمد  
 سلاماں اتے دروداں دے گلدستے بنا کے  
 دل دے میں ویٹھے چ رکھاں سجا کے  
 تا حشر میرا ایہو سامان ایں صل علی محمد  
 ملے دلاندا ایہ ذکر اے سہارا  
 جان تے جند توں وی بوہتا پیارا  
 قبر دا روشن ایہ کردا جہان ایں صل علی محمد  
 اللہ وی کردا اے معاف خطاواں  
 فرشتے وی اس لئی کردے دعاواں  
 ہر ویلے جس دی پڑھدی زبان ایں صل علی محمد  
 محسن مدینے آندے تے جانڈے  
 لوک ایہ وظیفہ نہیں پڑھدے پڑھانڈے  
 ایہو دین ساڈا تے ایہو ایمان ایں صل علی محمد

عبدالرزاق محسن



صلی اللہ علیہ وسلم

عشق نیا وچ اکھ روندی اے      داغ گناہواں دے دھوندی اے  
 دم دم رہندی پریم پریم      صلی اللہ علیہ وسلم  
 نال اشارے جن نوں توڑے      ڈیا سورج واپس موڑے  
 عقلوں باہر اوہدا ہر کم      صلی اللہ علیہ وسلم  
 صحرا وچ گلزاراں کھڑیاں      اڈیاں بازاء دے سنگ چڑیاں  
 جگ وچ آئے رحمت عالم      صلی اللہ علیہ وسلم  
 گلشن وچ بہاراں آئیاں      لوکاں دی مراداں پائیاں  
 ننھی ظلمت کے سب غم      صلی اللہ علیہ وسلم  
 سورج جن ستارے سارے      نور محمد ﷺ دے چمکارے  
 ریشماں لین حضوروں جم جم      صلی اللہ علیہ وسلم  
 کئی بوسیری روئی جامی      پڑھن درود سلام تمامی  
 رب رحمن فرشتے مسلم      صلی اللہ علیہ وسلم  
 یاد اوہدی وچ بزم سجائیے      اوہدے ناں دی جگنی گائیے  
 آؤ چھیڑیے روح دا سرگم      صلی اللہ علیہ وسلم  
 رحمت والے برکت والے      تائب اوہو عظمت والے  
 آقا ساڈے جیون جم جم      صلی اللہ علیہ وسلم

عبدالغنی تائب

صلی اللہ  
علیہ وسلم

سرورِ عالم ﷺ نورِ مجسم ، صلی اللہ علیہ وسلم  
 شافیءِ محشرِ مرسلِ اعظم ، صلی اللہ علیہ وسلم  
 لبِ یاقوتی لعلِ یمانی ، دندِ چنبیلی مکھ نورانی  
 کالی زلفِ ملائمِ ریشم ، صلی اللہ علیہ وسلم  
 ابرو قوسِ ماہی دے بجا! اکھیاں وچ مازاغ دا سرمہ  
 بولاں ماہی چھٹریا سرگم ، صلی اللہ علیہ وسلم  
 ازلی نور توں ہے نہیں سایا تدھ بن کسے درود نہ پایا  
 بیشک سارے نبی معظم صلی اللہ علیہ وسلم  
 تیریاں راہواں تیریاں تھاواں ساڈے لئی زیارت گاہواں  
 عشقِ نوں کرنا پیندا سرخم ، صلی اللہ علیہ وسلم  
 بولیا کیتا آکھیا سنیا ، امت لئی ہدایت بنیا  
 تیرا کملی والیا ہر کم ، صلی اللہ علیہ وسلم  
 عقلاں ہوشیدائی کھیاں ، سوچاں سوچ و دھائی کھیاں  
 امی ہو کے رہبرِ عالم ، صلی اللہ علیہ وسلم  
 باغِ بہاراں تے گلزاراں تیرے لئی سب لالہ زاراں  
 تیرے لئی نیں سارے موسم ، صلی اللہ علیہ وسلم  
 منبرِ لکڑی سمجھ ہٹائی ، سہہ نہ سکیا تیری جدائی

ہجر ستایا رووے چھم چھم ، صلی اللہ علیہ وسلم  
 لکھ ہزاراں صدیاں آئیاں تیریاں صفتاں دون سوائیاں  
 توں رب دا رب تیرا ہدم ، صلی اللہ علیہ وسلم  
 تیرا صدقہ رحمت باراں تیرا کم ایہ ذکر بہاراں  
 محفل محفل رم جھم رم جھم ، صلی اللہ علیہ وسلم  
 توں ایں جان جہان دی آقا میرا ایہ ایمان ہے آقا  
 تیرے روحاں نال مراسم ، صلی اللہ علیہ وسلم  
 شان بلالی سید حبشی ، نسبت تیری عزت بخشی  
 عاشق صادق تیرا خادم ، صلی اللہ علیہ وسلم  
 توں صاحب ایں ساقی ء کوثر تیرے دشمن بن گئے ابتر  
 تیرے منگتے صاحب منعم ، صلی اللہ علیہ وسلم  
 توں کریم کرم دیاں لوڑاں نظر کریں تے مکن تھوڑاں  
 تیری ذات ہے رحمت عالم ، صلی اللہ علیہ وسلم  
 صدقہ مرشد کرم توں کردے میری خالی جھولی بھردے  
 تیرے ولے آساں ہر دم ، صلی اللہ علیہ وسلم  
 آقا مل جائے تیری گدائی ، کیہ کرنی ایں سالک شاہی  
 ہر جا تیری ذات مقدم ، صلی اللہ علیہ وسلم  
 عثمان سالک مہروی

صلی اللہ علیہ وسلم

یا محمد مصطفیٰ صلی علی صلی علی  
بنور حق نور خدا صلی علی صلی علی  
بعد تہاڑے کوئی وی آقا نہیں نبی حشر تک  
شان ختم الانبیاء صلی علی صلی علی  
اک اشارے نال چن نوں توڑیا تے جوڑیا  
بے مثل ہے معجزہ صلی علی صلی علی  
دے رہی تہاڑی سچائی دی شہادت بر ملا  
اج تک غارِ حرا صلی علی صلی علی  
پڑھدا رہناں رات دن میں تے درود پاک  
ہے میری روح دی غذا صلی علی صلی علی  
روضے اقدس دی زیارت واسطے دل تڑفدا  
مینوں لو آقا بلا صلی علی صلی علی  
مشکلاں آساں سمجھے کر دیو شافی دیاں  
رات دن منگے دعا صلی علی صلی علی

عقیل شافی

.....☆☆.....



صلی اللہ  
علیہ وسلم

ایس عالم دا والی سوہنا پاک محمد صلی علی  
بھردا جھولیاں خالی سوہنا پاک محمد صلی علی

بیماراں لئی نے آپؐ طیب غریباں لئی غنی  
نبیاں وچ مثالی سوہنا پاک محمد صلی علی

کھاؤں لئی اسا توں ملدا ذات نبی دا صدقہ  
کھیتاں دی ہریالی سوہنا پاک محمد صلی علی

دن دا چائن، کلیاں مہکن، اوہڈے نال بہاراں  
سورج دی اے لالی سوہنا پاک محمد صلی علی

علی شان دے حرقاں اندر جیہدی اے روشنائی  
اوہ دل جان توں عالی سوہنا پاک محمد صلی علی

علی شان

## صلی اللہ علیہ وسلم

انساناں وچ سب توں اعلیٰ صلی اللہ علیہ وسلم  
نورِ ہدایت دا ہے اجالا صلی اللہ علیہ وسلم

اشرف، افضل، اکمل، احمد، نبیاں دی اوہ سدھر  
لکیاں دی لُج پالن والا صلی اللہ علیہ وسلم

مکر، فریب، ریا دی اگ نوں کیتا آن کے ٹھنڈا  
حق دا کیتا بول اوس بالا صلی اللہ علیہ وسلم

رحمت باری بن کے آیا مفلس تے ناداراں لئی  
جگ دے کل شاہاں دا مولا صلی اللہ علیہ وسلم

جیمڑے کام کرودھ جج ہے سن دنیا تے مشہور  
اوہناں دے ہتھ پیار دی مالا صلی اللہ علیہ وسلم  
عمر غنی

## صلی اللہ علیہ وسلم

ایہ رب دے محبوب دا در اے ، صلی اللہ علیہ وسلم  
 نور دا چائن پیش نظر اے ، صلی اللہ علیہ وسلم  
 پاک نبی جتھے لائے تلوئے اوتھے طور جے بہوں جلوے  
 سدا پئی ویکھے دیدہ تر اے ، صلی اللہ علیہ وسلم  
 جس دے کول نہ چاندی سوتا ، پائی بوری جس دا بچھونا  
 آمنہ دا اوہ لخت جگر اے ، صلی اللہ علیہ وسلم  
 آس مچلدی سینے دے وچ ، پہنچاں شہر مدینے دے وچ  
 یاد نبی ﷺ دی زاد سفر اے ، صلی اللہ علیہ وسلم  
 شام سویرے منگاں دعاواں میں وی شہر مدینے جاواں  
 حطیم اتے ہووے ازیر اے ، صلی اللہ علیہ وسلم  
 اسوڈ زمزم نوں جا ویکھاں ساتھ دتا جے میرے لیکھاں  
 بدد احد اج بار دگر اے ، صلی اللہ علیہ وسلم  
 عشق نے جد ہک جست لگائی ، تھہ آکاش دی انج مکائی  
 سوچیں پے گیا خود خضر اے ، صلی اللہ علیہ وسلم  
 دھرتی جو چین نوں شرماوے ، جس ول خلقت کھچدی آوے  
 پاک نبی ﷺ دا ایہو نگر اے ، صلی اللہ علیہ وسلم  
 ڈاکٹر غلام شبیر رانا

صلی اللہ  
علیہ وسلم

قلب سلامی جان درودی      بن جاوے انسان درودی  
 قدر حیاتی دی کر بچنا!      اک اک پل نوں جان درودی  
 شالا! بن جاوے عاجز دی      اکو جان پہچان درودی  
 آؤنھے جانھے ساہ پئے لگدے      دو نوری مہمان درودی  
 میری ملت آپ دی امت      میرا پاکستان درودی  
 پلے پنھ لو کم آوے گا      آپ دا ہر فرمان درودی  
 دنیا آکڑ دی تقوے تے      ساڈا مان تران درودی  
 فتوے لانے بھل جاویں گا      پڑھ رب دا اعلان درودی  
 ذکر فکر تے صبر شکر وچ      پل پل موجاں مان درودی  
 ملاں تیریاں توں ای جانیں      میرا دین ایمان درودی  
 روون دھوون جی کر دا اے  
 نعت سنا فیضان درودی

پروفیسر فیض رسول فیضان



# دروداں دے گجرے

بڑے دلربا نہیں دروداں دے گجرے    بڑے جاں فزا نہیں دروداں دے گجرے  
 فرشتے وی پڑھدے نہیں روضے تے آکے    بڑے دلکشا نہیں دروداں دے گجرے  
 خدا وی تے گھلدا اے عرشاں تے بیٹھا    بڑے دلکشا نہیں دروداں دے گجرے  
 خدائے دو عالم دیاں رحمتاں دی    گھٹا ای گھٹا نہیں دروداں دے گجرے  
 ایہ جہماں تے روحاں دے مرضاں دی خاطر    شفا ای شفا نہیں دروداں دے گجرے  
 ہے ایماں میرا تے ایسے ای گل تے    کہ رو بلا نہیں دروداں دے گجرے  
 قدم میرے ڈولن بھلا کیویں یارو    مرے رہنما نہیں دروداں دے گجرے  
 دروداں دے سارے ای اکھر نہیں کہندے    دعا ای دعا نہیں دروداں دے گجرے  
 محمد دی امت نوں مولا دے ولوں    خصوصی عطا نہیں دروداں دے گجرے

قمر حجازی

ﷺ

اللہ دے مہمان محمد صلی اللہ علیہ وسلم  
دو جگ دے سلطان محمد صلی اللہ علیہ وسلم

حشر نوں میرا مان محمد صلی اللہ علیہ وسلم  
بخشش دا سامان محمد صلی اللہ علیہ وسلم

ہر مسلم دی شان محمد صلی اللہ علیہ وسلم  
مومن دی پہچان محمد صلی اللہ علیہ وسلم

ورد میرا دن رین محمد ﷺ میرے دل دا چین محمد ﷺ  
ہین میری جند جان محمد صلی اللہ علیہ وسلم

اوہ مخلوق دے راج دلارے خالق دے محبوب پیارے  
ہر اک دے ارمان محمد صلی اللہ علیہ وسلم

آئے قمر اوہ جلد مہینہ ویکھاں میں وی شہر مدینہ  
میرا دین ایمان محمد صلی اللہ علیہ وسلم

ﷺ

محبوب حق خلق دے رہبر صلی اللہ علیہ وسلم  
ساقی کوثر شافع محشر صلی اللہ علیہ وسلم

تے جس دیاں قسماں رب پیا کھاندا  
ہے اوہ آپ دا چہرہ انور صلی اللہ علیہ وسلم

میرے آقا چودھویں دا جن  
باقی ہر پیغمبر اختر صلی اللہ علیہ وسلم

جد مینوں کوئی اوکڑ پہنچی  
بن کے آقا آگئے یاور صلی اللہ علیہ وسلم

سورج موڑے چن وی توڑے  
تابع آپ دے مغرب خاور صلی اللہ علیہ وسلم

آپ دے پیراں بیٹھ دے ذرے  
کاشف بن گئے نور دے محور صلی اللہ علیہ وسلم

رانا کاشف شکیل

ﷺ

ناں سوہنا جد چپ دی سدھر صلی اللہ علیہ وسلم  
نچدے ساہویں خشبو منظر صلی اللہ علیہ وسلم

چن سورج تے تارے بر دے اس سوہنے دیاں صفتاں کر دے  
بند مٹھی وچ پڑھدے کنکر صلی اللہ علیہ وسلم

جگ تے آن محبت وڈی وچ یتیمیاں شفقت وڈی  
بن آئے رحمت دے پیکر صلی اللہ علیہ وسلم

اتھرو "پلک بنیرے" آؤندے جذبے یاداں سینے لاؤندے  
اس جیون دے سچے رہبر صلی اللہ علیہ وسلم

نعت دا بانا جیہڑے پاندے روح تھیں کھڑ دے تے مہکاؤندے  
مہکاں وڈن سٹراں اکھر صلی اللہ علیہ وسلم

ہور کلیم دا کون سہارا جیوے سانول پیار دوارا  
سمھناں دا این توں چارا گز صلی اللہ علیہ وسلم

کلیم شہزاد



صلی اللہ  
علیہ وسلم

اوہدی ذات ہے مظہر نور خدا      اپنی اوہدی شان اوہ محبوب کبریا  
خورو ملک سب اس تے فدا      خود اللہ وی کہندا اے صل علی  
صل علی نبینا صل علی محمد

ناں اوہدے نال ٹلدی ہر بلا      حل مشکل ہووے جیہڑا دیوے صدا  
قسماں اوہدیاں کھاندا اے خدا      خود اللہ وی کہندا اے صل علی  
صل علی حبیبنا صل علی محمد

جیہڑا جھلک اک تکدا ہوش لیندا گوا      ویکھ لیندا جیہڑا کہوے مرجبا مرجبا  
ویکھنا جے اللہ دل ویکھو مصطفیٰ      خود اللہ وی کہندا اے صل علی  
صل علی رسولنا صل علی محمد

بنا کے وسیلہ اوہنوں منگو دعا      جیہڑا نام محمد مصطفیٰ صلی اللہ  
محبوب کم آوے گا اوہ روز جزا      خود اللہ وی کہندا اے صل علی  
صل علی کریمنا صل علی محمد

نام اوہدا اے دکھی دلا دی دوا      نام اوہدا اے دکھی دلاں لئی دوا  
سب توں سوہنا ناں محمد مصطفیٰ صلی اللہ      خود اللہ وی کہندا اے صل علی

صل علی نبینا صل علی محمد

محبوب احمد محبوب

## صلی اللہ علیہ وسلم

امت دا رکھوالا آیا صلی اللہ علیہ وسلم  
سرتے تاج لولاکی پایا صلی اللہ علیہ وسلم  
عرشیاں فرشیاں جشن منائے  
حوراں سہرا آن کے گایا صلی اللہ علیہ وسلم  
جاگے بھاگ حلیمیاں دائی دے  
جھولی دے وچ لال سجایا صلی اللہ علیہ وسلم  
کفر دے سن کے زور ترے  
حق دا ڈنکا آن وجایا صلی اللہ علیہ وسلم  
ادب تو جھک گئے سورج کعبہ  
چن وی آ کے سیس نوایا صلی اللہ علیہ وسلم  
جنت بنیاں اوہ تھاواں نہیں  
جتھے جتھے پیر نکایا صلی اللہ علیہ وسلم  
ہاہ ممتاز محبوب خدا دا  
نبیاں دا سردار بنایا صلی اللہ علیہ وسلم

ممتاز آصف

## صلی اللہ علیہ وسلم

سب نبیاں دے سردار محمد صلی علی  
 دو جگ دے انوار محمد صلی علی  
 رحمت والے برکت والے پاک نبی ﷺ  
 عظمت دے مینار محمد صلی علی  
 عرشاں والے فرشاں والے پاک رسول ﷺ  
 کوثر دے مختار محمد صلی علی  
 عزتاں انکھاں شرماں والے پاک حبیب ﷺ  
 امت دے غمخوار محمد صلی علی  
 ڈاہڈی سوہنی کملی موہڈے سج دی اے  
 رب دے نہیں دلدار محمد صلی علی  
 اچیاں سچیاں شانناں والے ہیں حضور ﷺ  
 دلدا چین قرار محمد صلی علی  
 ملے غلامی صابر نوں جے آقا ﷺ دی  
 چمکے لیکھ وقار محمد صلی علی

ﷺ

بات ضمن عنوان محمد ﷺ علم عمل عرفان محمد ﷺ  
 رفعت عظمت شان محمد ﷺ نبیاں دا سلطان محمد ﷺ  
 دین ادیان ایقان محمد ﷺ سارا ای قرآن محمد ﷺ  
 بعد خدا لچپال معظم ظاہر باطن پاک مکرم

نور ہدیٰ دا نور مجسم

صلی اللہ علیہ وسلم

رحمت فیض احسان محمد ﷺ کائنات دی آن محمد ﷺ  
 الفت دا پیمان محمد ﷺ مہراں دا اسمان محمد ﷺ  
 کون مکان امکان محمد ﷺ اللہ دی پہچان محمد ﷺ  
 بعد خدا لچپال معظم ظاہر باطن پاک مکرم

نور ہدیٰ دا نور مجسم

صلی اللہ علیہ وسلم

عرش زمین اسمان محمد ﷺ سدرہ کون مکان محمد ﷺ  
 کنت کنز آتان محمد ﷺ عشقے دا وجدان محمد ﷺ  
 تیری نعت جہان محمد ﷺ شاہد رب رحمن محمد ﷺ  
 بعد خدا لچپال محمد ﷺ ظاہر باطن پاک مکرم

نور ہدیٰ دا نور مجسم

صلی اللہ علیہ وسلم



دو جگ نوں گلزار بناون کلمے دی مہکار مچاون  
شفیع ام بن بھار اٹھاون آیا پیار ملہار وساون  
کن دا چمنستان محمد ﷺ اللہ دی برہان محمد ﷺ  
بعد خدا لہجپال معظم ظاہر باطن پاک مکرم

نور ہدیٰ دا نور مجسم

صلی اللہ علیہ وسلم

کوٹ کفر دے ڈھاون آیا کوڑ کرودھ مٹاون آیا  
ظلمت مار نساون آیا حق دا نور کھنڈاون آیا  
کملی وچ فرقان محمد ﷺ سارا ای غفران محمد ﷺ  
بعد خدا لہجپال معظم ظاہر باطن پاک مکرم

نور ہدیٰ دا نور مجسم

صلی اللہ علیہ وسلم

دے اخوت دان محمد ﷺ کیتا دور عدوان محمد ﷺ  
او جھڑ پھاٹی جان محمد ﷺ کھا نہ لئے عصیان محمد ﷺ  
ایمن رکھ دھیان محمد ﷺ کرناں پک احسان محمد ﷺ  
بعد خدا لہجپال معظم ظاہر باطن پاک مکرم

نور ہدیٰ دا نور مجسم

صلی اللہ علیہ وسلم

محمد نواز ایمن

صلی اللہ  
علیہ وسلم

صلی علی نبینا صلی علی محمد

پڑھن فرشتے ہر دن رات پڑھدی آپ خدا دی ذات  
توں وی شوق تھیں پڑھ سدا ، صلی علی محمد

صلی علی نبینا صلی علی محمد

جس دا ہر دم ایہ ذکر ، اوہنوں نہ کوئی غم فکر  
راضی اس تے نبی ، خدا ، صلی علی محمد

صلی علی نبینا صلی علی محمد

جس دل وچ اے حب رسول دوزخ وچ نہ جاسی مول  
جنت آپ ہی لئے بلا ، صلی علی محمد

صلی علی نبینا صلی علی محمد

محشر ہونا گرم جداں کملی دی مجلسی اوہنوں چھاں  
اکو بس جس نے کہیا ، صلی علی محمد

صلی علی نبینا صلی علی محمد

اس وچ نیاز ہے شک نہ مول شافع اس دا آپ رسول  
جو ہر وقت پڑھدا رہیا ، صلی علی محمد

صلی علی نبینا صلی علی محمد

الحاج نیاز احمد قادری

ﷺ

تہاڈی الفت تہاڈی چاہت، میری عقیدت میری عبادت  
اکھ دی ٹھنڈک روح دی فرحت، دیندی اے ہر دل نوں راحت  
صلی اللہ علیہ وسلم

ظالم دا مونہہ توڑ گئی اے، طوفاناں نوں موڑ گئی اے  
ٹٹے دل نوں جوڑ گئی اے، تہاڈی صورت تہاڈی سیرت  
صلی اللہ علیہ وسلم

حوراں رل مل عرش سجایا، جبرائیل پیغام لیایا  
اللہ تہانوں کول بلایا، عرش اعظم تہاڈی رفعت  
صلی اللہ علیہ وسلم

تہاڈی سطوت نے پر کھولے، محل ڈگے بت خانے ڈولے  
مٹھی دے وچ کنکر بولے، اللہ اللہ تہاڈی عظمت  
صلی اللہ علیہ وسلم

اکھ لگی اے سوئے محمد ﷺ دل وچ وسے روئے محمد ﷺ  
تھاں تھاں اے خوشبوئے محمد ﷺ بلھاں اتے ورداے حسرت  
صلی اللہ علیہ وسلم

یونس حسرت امرتسری

سلا ماں

دے

پھل

ﷺ

آپؐ دی آمد دے ہر حیلے ویلے نوں سلام  
 آپؐ دے پرکھاں سنے سارے قبیلے نوں سلام  
 آپؐ دے کلیاں توں بہوں سجرے تبسم نوں سلام  
 آپؐ دے پھلاں توں بہوں سوہنے تکلم نوں سلام  
 آپؐ دی رحمت بھری پھل دی روانی نوں سلام  
 آپؐ دی شفقت محبت مہربانی نوں سلام  
 آپؐ دی گفتار دے شہدی پیالے نوں سلام  
 آپؐ دے کردار دے سنگھنے اجالے نوں سلام  
 آپؐ دی اولاد دی پر نور عظمت نوں سلام  
 آپؐ دے اصحاب دی صد رشک قسمت نوں سلام  
 آپؐ دی قربانیاں عمرے تے حجاں نوں سلام  
 آپؐ نے جو پالیاں نیں اوہناں لجاں نوں سلام  
 آپؐ دے سیوک رہے سمھناں غلاماں نوں سلام  
 آپؐ نوں بھیجے دروداں تے سلاماں نوں سلام  
 آپؐ دے سانجھاں سلوکاں دے سنہڑے نوں سلام  
 آپؐ دی مرقہ دولے وسدے ویہڑے نوں سلام  
 آپؐ دے روضے نوں جانے ہر مسافر نوں سلام  
 آپؐ داس مان دے محراب منبر نوں سلام  
 آپؐ تے لکھیاں گیاں ان گنت نعمتاں نوں سلام  
 آپؐ دی بے انت صفتاں تے صفاتاں نوں سلام  
 اخلاق عاطف





صلی اللہ  
علیہ وسلم

مدینے دے والی سلام آ کھناواں  
میں ادنیٰ سوا لی سلام آ کھناواں

نبی جگ تے اللہ سوا لکھ گھلے  
توں سمھناں توں عالی سلام آ کھناواں

مخالف وی صادق امیں آ کھدے نہیں  
اے ہستی مثالی سلام آ کھناواں

ایہ سدھر کہ سایا کرے میرے سرتے  
تیری کملی کالی سلام آ کھناواں

میں ارشد نما نا غلام آپ دا ہاں  
جہاناں دے والی سلام آ کھنا واں

پروفیسر ارشد اقبال ارشد

ﷺ

جہاناں دی جاں تے کروڑاں سلام  
تے رحمت دی چھاں تے کروڑاں سلام

دلاں دا جو چین اے تے اکھاں دی ٹھنڈک  
محمد ﷺ دے ناں تے کروڑاں سلام

بڑی سوئی تھاں تے ہے آقا دا روضہ  
ہوون اوس تھاں تے کروڑاں سلام

جو چم چم کے لوری نبی نوں سی دیندی  
ہوون اوس ماں تے کروڑاں سلام

حرا وچ جو وگدے رہے ہیں ارشد  
انہاں ہنجواں تے کروڑاں سلام

پروفیسر ارشد اقبال ارشد

ﷺ

مدینے چ جا کے سلام آکھ آیاں  
میں سر نوں جھکا کے سلام آکھ آیاں

مرے آقا کیتا کرم میرے اتے  
میں خوشیاں منا کے سلام آکھ آیاں

گناہ کر کے چیتے میں شرمندہ ہويا  
میں ہنجو وگا کے سلام آکھ آیاں

بقیع تے قبا نالے گلیاں چ گھمیاں  
میں احد دی جا کے سلام آکھ آیاں

میں نعتاں دی صورت چ پڑھے استغاثے  
میں نعتاں سنا کے سلام آکھ آیاں

مواجے دے ساہنویں کھلوتا رہیاواں  
تے قدماں چ جا کے سلام آکھ آیاں

پروفیسر ارشد اقبال ارشد

صلی اللہ  
علیہ وسلم

سلام اس تے جیہڑا خالق دا بندہ بن کے آیا اے  
سلام اس تے جیہڑا دو جگ دا مولا بن کے آیا اے

سلام اسے جیہڑا رحمت مجسم بن کے آیا اے  
سلام اس تے جیہڑا ناموس آدم بن کے آیا اے

سلام اس تے جیہڑا انسان کامل بن کے آیا اے  
سلام اس تے جیہڑا کونین دا دل بن کے آیا اے

سلام اس تے جو ناداراں دا چارا بن کے آیا اے  
غریباں ناتواناں دا سہارا بن کے آیا اے

اعظم چشتی

ﷺ

غارِ حرا دے مکین تے سلام  
 عرب دے ماہِ مبین تے سلام  
 جلوہ نمائی جس جا تے ہوئی  
 کرماں والی اُس زمین تے سلام  
 ہوئی ملاقات سدرہ تے جس دی  
 دلبر اوس دل نشین تے سلام  
 دنیا دی محفل اے آکے سجائی  
 آپ دے پائے حسین تے سلام  
 بخشش کرائی امت دی جھک کے  
 اعلیٰ ارفع جبین تے سلام  
 احمد ﷺ محمد ﷺ اے ناں بڑا پیارا  
 منزلِ مدثرِ یسین تے سلام  
 مشرک وی آکے رکھن امانت  
 صادقِ صالحِ امین تے سلام  
 ساری خدائی شیدائی جس دی  
 راحت میرا اس حسین تے سلام



## صلی اللہ علیہ وسلم

ترا سبز گنبد بڑی وار ڈٹھا  
میں بہہ کے تے ساہنویں لگاتار ڈٹھا  
تے نظراں جھکا کے سلام آکھناواں  
میں ہر سال جا کے سلام آکھناواں

گناہواں نوں چیتے میں کر رووناواں  
میں کیتے تے ڈاہڈا چگی ہووناواں  
تے ہنجو وگا کے سلام آکھناواں  
میں ہر سال کنے جا کے سلام آکھناواں

کدے باغ جنت چ سجدے وی کیتے  
مواجے دے ساہنویں کدے وقت بیتے  
کدے نیویں پا کے سلام آکھناواں  
میں ہر سال جا کے سلام آکھناواں

میں اوتھے وی محفل سجاندا ہاں رہندا  
میں پڑھ پڑھ کے نعتاں سناندا ہاں رہندا  
میں مستی چ آ کے سلام آ کھناواں  
میں ہر سال جا کے سلام آ کھناواں

کدوں فیر آسی اوہ ویلا سہانا  
سویرے سویرے قبا ولے جانا  
تصور چ لیا کے سلام آ کھناواں  
میں ہر سال جا کے سلام آ کھناواں

میرے گھر چ زخمی غریبی دے ڈیرے  
تساڈے کرم دے ای ہوندے نہیں پھیرے  
میں تاں ہی تے جا کے سلام آ کھناواں  
میں ہر سال جا کے سلام آ کھناواں  
میاں محمد اقبال زخمی

صلی اللہ  
علیہ وسلم

مدینے دے یارو سلام" علیکم  
اے گلیو! بزارو! سلام" علیکم

دنے رات مینوں تساں یاد آؤنا  
حسینو! نظارو! سلام" علیکم

نہ ہن روز جانا قبا ولے ہوسی  
قبا دے منارو! سلام" علیکم

فرشتے وی روجھے دوالے پئے پڑھدے  
پکارو . پکارو سلام" علیکم

کدوں فیر خورے میں آواں گا زخمی  
حرم دی دیوارو! سلام" علیکم  
میاں محمد اقبال زخمی

.....☆☆.....

صلی اللہ  
علیہ وسلم

درود پڑھ لو نئی تے سارے سلام آکھو سلام آکھو  
اوہ آمنہ دے ہین دلارے سلام آکھو سلام آکھو  
اوہ خوش نصیباں نوں سوہنا درتے بلاکے روضہ وکھاوندا اے  
اوہ عاشقاں نوں بلاکے درتے نصیب سترے جگاوند اے  
لیکھاں والے چڑھن ستارے سلام آکھو سلام آکھو  
اوہ آقا دکھیاں نوں سینے لاوے نہ خالی آوے جو درتے جاوے  
اوہ غم دے مارے نوں راضی کروا اوہ ڈگیاں نوں ہے آپ اٹھاوے  
بیڑی سب دی لگے کنارے سلام آکھو سلام آکھو  
کرودعاواں ایہ رل کے سارے سوہنا سب دے چا دیدے ٹھارے  
کچھ نہ پلے ہے عمل ساڈے آقا باجھوں نہیں ہور سہارے  
جے جنتاں وچ بنانے ڈھارے سلام آکھو سلام آکھو  
بادشاہ وی سواہی درتے تے شہنشاہ وی نیں تیرے بردے  
چھپالے ساجد نوں کملی پٹھاں اس دے ظاہر نہ ہون پردے  
غلام تیرا کدی نہ ہارے سلام آکھو سلام آکھو  
اقبال ساجد

ﷺ

میرا سلام لے جا طیبہ نوں جان والے

سوہنے نبی دے در دا دیدار پان والے

چمکی اے تیری قسمت اچا نصیب تیرا

آقا دے پاک در تے ہويا اے تیرا پھیرا

سوہنے نبی دے در تے ہے رحمتاں دا ڈیرا

میرے حضور نوں توں دیویں سنبھا میرا

اپنا نصیب جا کے اج آزمان والے

میرا سلام لے جا طیبہ نوں جان والے

پہلاں توں جا کے اپنے اس شوق نوں مٹاویں

سوہنے نبی دے جلوے جی بھر کے دیکھ آویں

لکھاں نوں وی توں چم کے اکھاں دینال لاویں

فرما جراتوں دل دا سب کچھ ای کہہ سناویں

آؤندے نہیں ایس دیتے سب آن بان والے

میرا سلام لے جا طیبہ نوں جان والے

رو رو کے عرض کرنا آقا ﷺ تری دہائی

کچھ اے ظلمتاں نے ساڈے تے آچڑھائی



تیرے پیارے دین دی دشمن ہوئی خدائی  
آ واسطہ ای رب دا ہن کر توں رہنمائی

طعنے پئے دیوندے نیں سانوں جہان والے  
میرا سلام لے جا طیبہ نوں جان والے

تیرے ای نور تھیں ایہ روشن ہويا زمانہ  
توں لاڈلا خدا دا بے مثل تے یگانہ  
رحمت پئی ڈھونڈ دی اے تیری کوئی بہانہ  
اک وار ساڈے تے وی آقا ﷺ کرم کمانا

سکہ اے تیرا جاری عالی نشان والے  
میرا سلام لے جا طیبہ نوں جان والے

ساڈے دلاں نوں دولت الفت دی بے بہادے  
اپنے کرم دا صدقہ دیدار ہن کرا دے  
دنیا دی ہر مصیبت ساڈے سروں ہٹا دے  
دکھی رضا دے دل نوں توں شوق دا صلہ دے

تیرے غلام دیکھے سارے ای شان والے  
میرا سلام لے جا طیبہ نوں جان والے

محمد اکرم رضا

## صلی اللہ علیہ وسلم

ہے تیری عظمت وی ڈھیر ساری میں تینوں آقا سلام آکھاں  
ہے جگ تے تیرا ہی فیض جاری میں تینوں آقا سلام آکھاں

رسول آیا جہان اتے نہ تیری سیرت دا ہور آقا  
میں تیرے صدقے میں تیتھوں واری میں تینوں آقا سلام آکھاں

خبیث نالے بلالؓ وانگوں تے چار یاراں دے پیار وانگوں  
ہے عشق والا خمار طاری میں تینوں آقا سلام آکھاں

جے توں نہ آؤندا جہان اتے نہ باغاں دے وچ بہار آؤندی  
تو لے کے آیا بہار ساری میں تینوں آقا سلام آکھاں

زبان اپنی نوں پاک کر کے حضور آکھاں میں نعت تیری  
درود پڑھ کے ہزار واری میں تینوں آقا سلام آکھاں  
اکرم سعید اکرم

## صلی اللہ علیہ وسلم

عجب نظارے خدا دکھاوے درود پڑھیاں سلام پڑھیاں  
 دلاں دے اندر سرور آوے درود پڑھیاں سلام پڑھیاں  
 درود بھیجو نبی دے اتے خدا نے قرآن وچ کہیا اے  
 گواہی سارا قرآن دیندا نہ کوئی ختم النبی جہا اے  
 سیاہ مقدر چمک دا جاوے درود پڑھیاں سلام پڑھیاں  
 دلاں دے اندر سرور آوے درود پڑھیاں سلام پڑھیاں  
 جیہنوں پکاندے نیں دن تے راتیں ہے نوریاں دا ایہ ورد اعلیٰ  
 ہے بھیج دا اے حبیب اتے درود خود وی اوہ عرش والا  
 دلاں دے دیوے خدا جگاوے درود پڑھیاں سلام پڑھیاں  
 دلاں دے اندر سرور آوے درود پڑھیاں سلام پڑھیاں  
 درود جیہڑا اکواری پڑھدا ثواب دس نیکیاں دا مل دا  
 بلند درجات اللہ کردا تے زنگ لتھدا اے میلے دل دا  
 ثواب ہر اک بشر ای پاوے درود پڑھیاں سلام پڑھیاں  
 دلاں دے اندر سرور آوے درود پڑھیاں سلام پڑھیاں  
 کراں وظیفہ قلندری میں نبی پیارے دی دید پاواں  
 درود پڑھ کے سلام پڑھ کے میں اپنے آقا دی نعت گاواں  
 ہر ایک محفل تے نور چھاوے درود پڑھیاں سلام پڑھیاں  
 دلاں دے اندر سرور آوے درود پڑھیاں سلام پڑھیاں  
 محمد اکرم قلندری

## صلی اللہ علیہ وسلم

نبی ﷺ دے عاشق زمانے سارے درود پڑھدے سلام پڑھدے  
 ایہ جن سورج تے مل کے تارے درود پڑھدے سلام پڑھدے  
 جدوں نبی ﷺ دا ظہور ہویا ' ہمیر دنیا چوں دور ہویا  
 خدا دی قدرت دے سب نظارے درود پڑھدے سلام پڑھدے  
 عرب دیاں سمھے رل کے مائیاں ودھائیاں دیون سی گھروچ آئیاں  
 فلک دے مل کے فرشتے سارے درود پڑھدے سلام پڑھدے  
 حلیمہ دائی دے بھاگ جاگے تری عاوہ حضرت نوں سینے لا کے  
 شجروی رستے دے جھک کے سارے درود پڑھدے سلام پڑھدے  
 جیہڑے وی پاسے نبی ﷺ سی جاندے خشبو و آں دے ہلے سی آندے  
 زمانے جھک کے نبی ﷺ دوارے درود پڑھدے سلام پڑھدے  
 نبی ﷺ نے اچا مقام پایا ' نہ سوہنے ورگا کوئی وی آیا  
 خدا نے جنے نبی اتارے درود پڑھدے سلام پڑھدے  
 قلندری جیہڑے نعت پڑھدے اوہ ورد خیر الانام کردے  
 نبی ﷺ نوں لگدے نہیں بہت پیارے درود پڑھدے سلام پڑھدے  
 محمد اکرم قلندری

صلی اللہ  
علیہ وسلم

شہ دو سرا نوں سلام آ کھناواں  
حبیب خدا نوں سلام آ کھناواں

جو آقا دے موڈھے تے نت جھولدی سی  
میں سوہنی ردا نوں سلام آ کھناواں

مدینے نوں جاندے ہوئے قافلے دے  
میں اک اک بھرا نوں سلام آ کھناواں

نظر آوندا اے جو شاہواں توں اچا  
میں تیرے گدا نوں سلام آ کھناواں

مدینے لے جاؤن دا دے کے سنبھا  
میں امجد ہوا نوں سلام آ کھناواں

امجد اقبال امجد



صلی اللہ  
علیہ وسلم

صبا درِ مصطفیٰ تے جا کے کہویں درود و سلام میرا  
 نبی ﷺ دے قدماں تے سرنوٹ جھکا کے کہویں درود و سلام میرا  
 توں لے کے بوسہ اوہ جالیاں دا اوہ جالیاں کرماں والیاں دا  
 سوال کہہ کے سوالیاں دا کہویں درود و سلام میرا  
 دو جگ دے داتا دو جگ دے والی جیہدے ہے موڈھے تے کملی کالی  
 توں اوہدے روضے دی چم کے جالی کہویں درود و سلام میرا  
 مدینے اٹھ کے صبح سویرے حضور ﷺ دے در دے ہون پھیرے  
 توں سبز گنبد دے لے کے پھیرے کہویں درود و سلام میرا  
 توں سامنے روضے دے کھلو کے میری طرح زار و زار رو کے  
 نثار روضے دے اتوں ہو کے کہویں درود و سلام میرا  
 لیا مدینے دا سب نے رستا میں ایتھے ای رہ گیا ترس دا  
 توں جا کے روضے تے دست بستہ کہویں درود و سلام میرا  
 ہوائے اتنا سوال میرا مدینے ہووے گزر جے تیرا  
 توں لے کے روضے دے گرد پھیرا کہویں درود و سلام میرا  
 امیر پوری امید ہووے مدینے والے دی دید ہووے  
 ہزاراں عیداں دی عید ہووے کہویں درود و سلام میرا  
 امیر صابری

صلی اللہ  
علیہ وسلم

سوہنیا! تیرا مدینہ الصلوٰۃ والسلام  
جسراں مندری وچ نگینہ الصلوٰۃ والسلام

تیری الفت دا خزینہ الصلوٰۃ والسلام  
ٹھار دا اے سب دا سینہ الصلوٰۃ والسلام

اوس ویلے دا بدل نہیں مینوں لہنا فرکتے  
جد میں ویکھاں گا مدینہ الصلوٰۃ والسلام

دل ج میرے پیار دا دریا ئے ٹھاٹھاں مار دا  
آوندا جد جج دا مہینہ الصلوٰۃ والسلام

حضرت حسانؓ دا صدقہ عطا مینوں کرو  
نعت آکھن دا قرینہ الصلوٰۃ والسلام

دل مچلدا اے جدوں تاں ٹرپوے بن بادباں  
میری سوچاں دا سفینہ الصلوٰۃ والسلام  
امین باہر

## صلی اللہ علیہ وسلم

راہیا جاندیا مدینے ول جاویں تے میرا وی سلام آکھ دئیں  
 حال جا کے میرا رو رو سناویں تے میرا وی سلام آکھ دئیں  
 یاداں اوہدیاں نے کیتا بے چین ایں روندے پل پل رہندے میرے نین ایں  
 اک دکھیا تے کرم کماویں تے میرا وی سلام آکھ دئیں  
 دور پل وی نہ دوریاں چ لنگھدا دکھ ہجر والا ناگ وانگوں ڈنگدا  
 اوہدے در اتے سرنوں جھکاویں تے میرا وی سلام آکھ دئیں  
 حاکم سب دا بنایا اوہنوں رب نے حامی بنایا ایں اوہنوں سارے جگ نے  
 ایہ سنبھڑا میرا سوہنے نون پہنچاویں تے میرا وی سلام آکھ دئیں  
 آکھیں دین کدے مینوں وی دکھالی شان جیہدی سارے بنیاں چ نرالی  
 پیریں پے پے کے سوہنے نون مناویں تے میرا وی سلام آکھ دئیں  
 کسے پل وی نہ بھل دا خیال اے میں جہے عاصیاں دا اوہو لچپال اے  
 لچ پالا چھیتی لکیاں نبھاویں تے میرا وی سلام آکھ دئیں  
 اوہدی رحمتاں نے دو جگ گھیرے نیں مونہہ کفر ولوں ساڈے اوہنے پھیرے نیں  
 عرضاں ساریاں توں آقا نون سناویں تے میرا وی سلام آکھ دئیں  
 اوہدے باجھوں میں تے کم دی نہ کار دی نہ پل پل اوہدا میں پکار دی  
 اوہدے بوہے اتے پلا توں وچھاویں تے میرا وی سلام آکھ دئیں  
 اوہدے شہر وچ تھاں میں آں منگدا کالی کالی دی چھاں میں آں منگدا  
 کالی کالی چ سوہنیا! لکاویں تے میرا وی سلام آکھ دئیں  
 انصر عقیل حیدری

## صلی اللہ علیہ وسلم

نبیٰ محسن پیارے تے سلام آکھو سلام آکھو  
 غریباں دے سہارے تے سلام آکھو سلام آکھو  
 اوہ محبوب رب دے نیں دلاں دا چین تے راحت  
 اس امی نیارے تے سلام آکھو سلام آکھو  
 دروداں تے سلا ماں دی اساں ڈالی پہنچائی اے  
 گنبد دے نظارے تے سلام آکھو سلام آکھو  
 اوہ نیں شفقتاں والے میرا ایمان ہے پکا  
 اس رحمت دے دھارے تے سلام آکھو سلام آکھو  
 ربیع اول مہینہ اے رحمت دا سفینہ اے  
 اس دے کھیون ہارے تے سلام آکھو سلام آکھو  
 محبت دا تقاضا اے جے نعتاں دی جے محفل  
 عبداللہ دے تارے تے سلام آکھو سلام آکھو  
 اساں اوہنوں بھلانا نہیں حشر وچ دکھ اٹھانا نہیں  
 قریشی جگر پارے تے سلام آکھو سلام آکھو  
 اس آقا دا صدقہ ای اسیں آزاد ہاں کھاندے  
 اوہدے نوری دوارے تے سلام آکھو سلام آکھو  
 ایم اے آزاد کھو کھر

ﷺ

رسالت بہاراں نوں لکھاں سلاماں  
 اوہدے لالہ زاراں نوں لکھاں سلاماں  
 طواف حریم نبی ﷺ نیں جو کر دے  
 کبوتر قطاراں نوں لکھاں سلاماں  
 جہاں کملی والے تے جاناں نیں دتیاں  
 صحابہ تے یاراں نوں لکھاں سلاماں  
 میں خاکِ مدینہ دا ہر ذرہ چماں  
 تے گلیاں بزاراں نوں لکھاں سلاماں  
 بنا کے نیں جیہڑے فرشتے لیاؤندے  
 دروداں دے ہاراں نوں لکھاں سلاماں  
 نگاہواں دا مرکز تے دل دا سکون اے  
 ایہ یاداں دے غاراں نوں لکھاں سلاماں  
 مدینے دی جوہ دے کنڈے وی پھل نیں  
 مدینے دے خاراں نوں لکھاں سلاماں  
 یتیمیاں غریباں دے وارث نوں انور  
 تے بے کس دے یاراں نوں لکھاں سلاماں  
 ایم انور بھٹی اختر آبادی



ﷺ

خیر البشر کہواں یا خیر الانام آکھاں  
 حسن تمام آکھاں ماہ تمام آکھاں  
 لکھ وار کہاں درود ہزاراں سلام آکھاں  
 بدرالدجی کہواں شمش الضحیٰ کہواں  
 نبیاں توں اچا سوہنیا! تیرا مقام آکھاں  
 لکھ وار کہاں درود ہزاراں سلام آکھاں  
 اکھیاں چ سج دے قدرتی مازاغ دے ڈورے  
 کیتا اے مست جگ نوں نظراں دے جام آکھاں  
 لکھ وار کہاں درود ہزاراں سلام آکھاں  
 تیرا ناں لیاں ہزاراں ٹل جانڈیاں بلاواں  
 تیرے نام دا وظیفہ دل دا آرام آکھاں  
 لکھ وار کہاں درود ہزاراں سلام آکھاں  
 بیشک توں سوہنیا! دو جگ دا این قاسم  
 زمانے دے بادشاہ وی تیرے غلام آکھاں  
 لکھ وار کہاں درود ہزاراں سلام آکھاں  
 عجز نال میں بشیر سوہنی سرکار تائیں  
 لکھ وار کہاں درود ہزاراں سلام آکھاں  
 بشیر الماس بائی

صلی اللہ  
علیہ وسلم

خاتم الانبیاء ﷺ تے ہزاراں سلام سرور دوسرا ﷺ تے ہزاراں سلام  
چمکے دھرتی دے مکھ تے جمال اوسدا گونجا انبراں تے جلال اوسدا  
احمد مجتبیٰ ﷺ تے ہزاراں سلام خاتم الانبیاء ﷺ تے ہزاراں سلام  
بن کے آیا اوہ غمخوار انسان دا دروتے دکھ زمانے دے سب جان دا  
سبھ دے مشکل کشا تے ہزاراں سلام خاتم الانبیاء ﷺ تے ہزاراں سلام  
فرش تے عرش تک چانی اوسدی جن تے سورج دے وچ روشنی اوسدی  
اوس بدر الدجی ﷺ تے ہزاراں سلام خاتم الانبیاء ﷺ تے ہزاراں سلام  
اوہدا رتبہ بڑا اوہدی رحمت بڑی عاصی تھوڑے نیں اوہدی شفاعت بڑی  
اوس حبیب خدا ﷺ تے ہزاراں سلام خاتم الانبیاء ﷺ تے ہزاراں سلام  
سارے عالم نوں کھچدی گلی اوس وی کر دے شاہ تے گدا چاکری اوسدی  
جگ دے حاجت روا تے ہزاراں سلام خاتم الانبیاء ﷺ تے ہزاراں سلام  
سبز گنبد نوں دن رات حمدی ہوا اوتھے پنچھی وی پڑھدے نیں صل علی  
اوس پیاری فضا تے ہزاراں سلام خاتم الانبیاء ﷺ تے ہزاراں سلام  
روضہ دیکھن دامنوں وی چاء اے بڑا کیہ کراں پر ایہ دل پر خطا اے بڑا  
اوہدے لطف و عطا تے ہزاراں سلام خاتم الانبیاء ﷺ تے ہزاراں سلام

صلی اللہ  
علیہ وسلم

محبت ادب شوق الفت عقیدت تھیں سرنوں جھکا کے سلام آ کھنا واں  
تصور چ ڈب کے ترے پیار دی دل تے رنگن چڑھا کے سلام آ کھنا واں

میں مٹی دا ذراتوں قدرت جلوہ کراں تے میں کیوں کراں صفت تیری  
دلیلاں دی وگن توں ٹپ کے تے عشقے دی نگری چ آ کے سلام آ کھنا واں

محبت دا تینوں خدا کہہ رہیا واں خدا دی قسم ہے بجا کہہ رہیا واں  
کہ وحدت دی نہیں چوں وضو کر کے دوئی نوں دل توں گوا کے سلام آ کھنا واں

جیہدے واسطے کن الایا گیا سی جیہدے کارنے جگ بنایا گیا سی  
جیہدے ہتھ ہتھ نہیں خدا دے میں بتو اوہنوں پھڑا کے سلام آ کھنا واں

مرا جسم اتھے مری جان اتھے مری اکھ اتھے مرا دھیان اتھے  
بخاری میں ہر روز فجری تے شامیں مدینے چ جا کے سلام آ کھنا

تنویر بخاری

صلی اللہ  
علیہ وسلم

زمانے دے والی نوں میرا سلام    اوہدی شان عالی نوں میرا سلام  
 زمانے نوں جیہنے اے کلمہ سکھایا    جو بن کے گھٹا رحمتاں دی اے آیا  
 جو دو جگ دا آقا تے مولا سدایا    ہے اس بے مثالی نوں میرا سلام  
 غریباں یتیمیاں دا وارث سداوے    جو پھڑ حبشیاں نوں سینے تھیں لاوے  
 جو امتی امتی ای پیا ازلوں الاوے    اوہدی اچ خیالی نوں میرا سلام  
 اوہ جس آکے نیکی دے ول موڑیا سی    برائی دا غلبہ وی جس توڑیا سی  
 تے جس آکے بت پوچھوں ہوڑیا سی    ہے اس وڈ کمالی نوں میرا سلام  
 سی جس ماڑیاں نوں وی جینا سکھایا    جس تن سو تیراں دا لشکر بنایا  
 تے بدر وچ ہزاراں دا سرسی نوایا    ہے اس شاہ جلالی نوں میرا سلام  
 ابو جہل دی جس کمر توڑ دتی    صحابی نوں اوہدی اوہ بانہہ موڑ دتی  
 لعاب دہن لا کے جس جوڑ دتی    اوہدی لازوالی نوں میرا سلام  
 خدا عرش اتے سی جس نوں بلایا    تے تعظیم لئی نوریاں سر جھکایا  
 خدا عرش اتے سی جس نوں بلایا    ذات اس نرالی نوں میرا سلام  
 توں رحمت دا بوٹا میرے گھرای لاوے    خدا واسطے خیر مینوں وی پا دے  
 تے پنچھی دے تے مقدر جگا دے    ترے ہر سوالی نوں میرا سلام  
 زمانے دے والی نوں میرا سلام    اوہدی شان عالی نوں میرا سلام  
 جاوید پنچھی

صلی اللہ  
علیہ وسلم

راہیا مدینے جا کے میرا سلام آکھیں  
عشق تیرے دے غم اندر تڑنے تیرا غلام آکھیں  
میرا سلام آکھیں

ہجر اندر اداس اکھیاں ترسن پیاں برسن پیاں  
کرم کر دے اے والی جگ دے سنہری جالی نوں تھام آکھیں  
میرا سلام آکھیں

دید تیری لئی دل دے اندر لکھاں آساں لے کے بیٹھا  
روضے اگے سر جھکا کے ہو کے با احترام آکھیں  
میرا سلام آکھیں

امید دا گلشن ایہ سکدا جاوے روندی پئی اے اداس بلبل  
بلا لو شانِ کرم دے صدقے حضور خیرالانام آکھیں  
میرا سلام آکھیں

نجات پاواں میں وی جے کر سبز گنبد دی دید پاواں  
جنت دی طلب نہ خواہش دنیا نہ شوقِ حور و خیام آکھیں  
میرا سلام آکھیں

مدینے جاواں دیدار پاواں پڑھاں درود و سلام لکھاں  
قادری توں وی دور ہووے للہ غم دی ایہ شام آکھیں  
میرا سلام آکھیں

حنیف قادری



ﷺ

پاک نبی ﷺ دا کھڑا دے لفظاں نال مقام  
 مولا آپ تے کل فرشتے بھیج دے رہن مدام  
 خاکی آبی ناری سارے پڑھدے خاص تے عام  
 حدوں ودھ درود نبی ﷺ تے حدوں ودھ سلام  
 فرض اطاعت جس دی سب توں توڑ قیامت تیک  
 اک لکھ کئی ہزار نبی نوں اوہدی رہی اڈیک  
 بنیا جو معراج دی واہیں سب دا پیش امام  
 حدوں ودھ درود نبی ﷺ تے حدوں ودھ سلام  
 اوہدا ذکر اے ٹھنڈ اکھیاں دی اوہ ازلاں دا چاشن  
 نبیاں قطباں ولیاں اوتاراں دے دل دی دھڑکن  
 غوث ابدال شہید صدیق نہیں اوہدے داس تمام  
 حدوں ودھ درود نبی ﷺ تے حدوں ودھ سلام  
 کہکشاواں چن تارے کردے شاہ زمن دا ورد  
 شجر تے حجر دا ایہو وظیفہ کرن کرن دا ورد  
 کل وحوش طیور وی پڑھدے پڑھدے کل انام  
 حدوں ودھ درود نبی ﷺ تے حدوں ودھ سلام

جیہڑی راہوں لنگھن آوے خوشبو بھینی بھینی

شہد دی مکھی پڑھے درود تے کوڑ بنے شیرینی

ناں آقا ﷺ دا لے کے بندھ دے پھل پنڈے احرام

حدوں ودھ درود نبی ﷺ تے حدوں ودھ سلام

کوئی ویلا وقت ہووے تے بھاویں کوئی تھاں

رکھ دعا دے اگے پچھے توں لچپال دا ناں

ایسے ناں دے صدقے مل دا روگاں توں آرام

حدوں ودھ درود نبی ﷺ تے حدوں ودھ سلام

بیکر ناں سوہنے دا لیندے رسیے گلے باتے

مکن دنّاں دے اندیشے تے راتاں دے جگراتے

رکھ وظیفہ اپنا نازش ایہو صبح تے شام

حدوں ودھ درود نبی ﷺ تے حدوں ودھ سلام

محمد حنیف نازش قادری



## صلی اللہ علیہ وسلم

ایہ نور دا اے خزینہ یارو درود پڑھ لو سلام پڑھ لو  
 دعا دا ہے ایہ قینہ یارو درود پڑھ لو لب سلام پڑھ لو  
 پڑھن نبی ﷺ دے غلام لکھاں ' درود لکھاں سلام لکھاں  
 جے ویکھنا اے مدینہ یارو درود پڑھ لو سلام پڑھ لو  
 غماں دے ات ڈونگھے بحر وچوں ستم دی مونہہ پائی لہر وچوں  
 بچاؤنا اے جیکر سفینہ یارو درود پڑھ لو سلام پڑھ لو  
 درود پڑھ لو امر زہود گئے عتے قبر وچ باخبر رہود گے  
 جے مر کے چاؤہندے او جینا یارو درود پڑھ لو سلام پڑھ لو  
 پڑھن ملائک تے انبیاء وی وظیفہ رکھدے نیں اولیاء وی  
 ایہ بھلیو جے کدی نہ یارو درود پڑھ لو سلام پڑھ لو  
 صفر ہووے بھاویں ہووے رمضان رجب محرم تے شعبان  
 کوئی وہ ہووے مہینہ یارو درود پڑھ لو سلام پڑھ لو  
 کدورتاں دا حساب مکے غماں دا نازش عذاب مکے  
 جے صاف رکھنا اے سینہ یارو درود پڑھ لو سلام پڑھ لو

محمد حنیف نازش قادری

ﷺ

مرتبہ اے سب توں اعلیٰ الصلوٰۃ والسلام  
میرے آقا شاہ والا الصلوٰۃ والسلام

سب پیغمبر مقتدی نیں آپ دے میرے رسول  
آپ دی اے شان بالا الصلوٰۃ والسلام

اپنا ہووے یا پرایا خالی در توں نہ گیا  
ایہ کرم سب تھیں نرالا الصلوٰۃ والسلام

آپ دا میں امتی ہاں یا رسول عالمیں  
راہ طیبہ ہو سکھالا الصلوٰۃ والسلام

بن تہاڈے کون خالد دا اے وردی یا نبی ﷺ  
جپ دا رہندا نت اے مالا الصلوٰۃ والسلام  
خالد جاوید

ﷺ

مدینے دے گلی کوچے بازاراں نوں سلام آکھاں  
نبی ﷺ دی سوہنی مسجد دے میناراں نوں سلام آکھاں

بہشتی سیر وچ عرشاں تے ربدے ٹال امت لئی  
جو کہتے عرش تے قولاں قراراں نوں سلام آکھاں

جتھے رو رو کے منگیاں سن دھاواں مدنی ماہی نے  
اوہناں تھواواں نوں فرویکھاں تے غاراں نوں سلام آکھاں

جیہڑے بدر و حنین اندر نثار آقا ﷺ تے ہوئے سن  
میں اوہناں عاشقاں تے جاٹاراں نوں سلام آکھاں

نبی ﷺ دے عشق وچ جیہڑے سدا قربان ہندے رہے  
میں کملی والے دے سارے ای یاراں نوں سلام آکھاں

جہاں دے سر تے رکھیا دستِ شفقت جن عربی نے  
میں اوہناں بے سہاراں نوں لاچاراں نوں سلام آکھاں

حاجی دلشاد احمد جن



صلی اللہ علیہ وسلم

آمنہ دے لال پیارے الصلوٰۃ والسلام  
ہر دھی دل دے سہارے الصلوٰۃ والسلام  
تیری آمد تے ورھے رحمت دے بدل چار سو  
پے گئے ہر تھاں پکارے الصلوٰۃ والسلام  
فتح مکہ دے دہاڑے تیری عظمت دے طفیل  
کعبے دے بت ڈگے سارے الصلوٰۃ والسلام  
پہنچ کے سدرہ تے جد جبریل ہمت ہاریا  
عرش رب وا واجاں مارے الصلوٰۃ والسلام  
میں حلیمہ سعدیہ دی کیہ کراں عظمت بیان  
توں جہدے اجر نہیں چارے الصلوٰۃ والسلام  
آپ دی نعتاں دے صدقے پیدے سب شاعراں  
لیکھ سٹے نہیں سنوارے الصلوٰۃ والسلام  
ہو گئیاں طے منزلاں سب عشق احمد علیہ السلام والیاں  
نعت گوئی دے سہارے الصلوٰۃ والسلام  
اپنے ہادی نوں بلا کے درتے اپنے آپ خود  
دے بخشش دے اشارے الصلوٰۃ والسلام

رشید ہادی

## صلی اللہ علیہ وسلم

تمام کلیاں تے پھل سارے پڑھن ستارے سلام آکھو  
 کرو محمد ﷺ دا عشق سچا ملن سہارے سلام آکھو  
 نبی ﷺ نیں سردار انبیاء دے اوہناں نوں سب دا امام آکھو  
 نبی ﷺ تے سارے درود آکھو نبی ﷺ تے سارے سلام آکھو  
 نہ آسکے جو بیان اندر اوہ مرتبہ دو جہان اندر  
 خدا وی مدحت سرائی کردا نبی محمد ﷺ دی شان اندر  
 اوہناں دا رتبہ بلند اعلیٰ اوہناں دا اچا مقام آکھو  
 نبی ﷺ تے سارے درود آکھو نبی ﷺ تے سارے سلام آکھو  
 کدی اوہ سورج نوں موڑ دیندے تے مٹے چن نوں وی جوڑ دیندے  
 اوہ زور باطل دا توڑ دیندے کدی نہیں کوئی تھوڑ دیندے  
 اوہناں دے صدقے ای پل رہیا اے جہان بھر دا نظام آکھو  
 نبی ﷺ تے سارے درود آکھو نبی ﷺ تے سارے سلام آکھو  
 سجائی رکھو نبی ﷺ دی محفل ہر اک نعمت ہووے گی حاصل  
 نبی ﷺ دی الفت بناؤ منزل کوئی نہ ہووے گا پھر مقابل

سدا دروداں دے پھل بھیجو ملے گا سب نوں دوام آ کھو  
 نبی ﷺ تے سارے درود آ کھو نبی ﷺ تے سارے سلام آ کھو  
 نبی ﷺ نے کلمہ عطا اے کیا نماز روزہ عطا اے کیا  
 زکوٰۃ جذبہ عطا اے کیا تے حج جلوہ عطا اے کیا  
 اوہناں دے صدقے ملے تشہد رکوع سجدے قیام آ کھو  
 نبی ﷺ تے سارے درود آ کھو نبی ﷺ تے سارے سلام آ کھو  
 درود ہے اوہ بڑی عبادت قبول ہندی ہر ایک صورت  
 تے سارے لکھو ایہو ای دولت ملے گی ہر امتی نوں جنت  
 ہر اک ویلا درود دا اے درود صبح تے شام آ کھو  
 نبی ﷺ تے سارے درود آ کھو نبی ﷺ تے سارے سلام آ کھو  
 نبی ﷺ دی مدحت سرائی اعلیٰ نبی ﷺ دے وردی گدائی اعلیٰ  
 جو لو نبی ﷺ نال لگائی اعلیٰ جو نعت اس نے سنائی اعلیٰ  
 ریاض احمد دا کیا نصیبہ اوہنوں نبی ﷺ دا غلام آ کھو  
 نبی ﷺ تے سارے درود آ کھو نبی ﷺ تے سارے سلام آ کھو  
 پروفیسر ریاض احمد قادری

ﷺ

نوری روخنے ول درود سلام  
شام سویرے گھل درود سلام

جے کر نہیں یقین ذرا ازما  
ہر مشکل دا حل درود سلام

ہوندے ہنجواں دے 'تختے' نال  
زم زم رنگی چل درود سلام

دھڑکن دھڑکن بھیج درود ہزار  
ہر لمحے ہر پل درود سلام

سرگی ویلے اٹھ کے روز ریاض  
ہنجواں راہیں گھل درود سلام  
ڈاکٹر ریاض مجید

صلی اللہ  
علیہ وسلم

پہنچ کے روضے تے کملی والے دے میں وی اپنا سلام آکھاں  
بڑی تمنا سی میرے دل دی میں آکے آقا سلام آکھاں

کرم ایہ کیتا بلا کے مینوں دکھائے قدرت دے کئے جلوے  
میں کیوں نہ رہ کے مدینے ہر پل حضور والا سلام آکھاں

ہزاراں لکھاں نہیں لوک آندے سلام کہندے نیں رات دن اوہ  
ہے میرے دل دی بڑی تمنا میں سب توں اعلیٰ سلام آکھاں

ایہ عمر میری اے جی باقی مرا ارادہ ہے انشاء اللہ  
میں آکے ہر سال تیرے روضے تے میرے شاہا سلام آکھاں

نہ رکھ محتاج مینوں دنیا دا تیرے در دا رہواں سوالی  
درو پڑھدا رہواں ہمیشہ سدا خدایا سلام آکھاں

کدی کدی مینوں ہن وی لگدا ریاض جنہ ج میں آں بیٹھا  
میں سبز گنبد دے سائے پٹھاں کھلو کے مرزا سلام آکھاں



ﷺ

یا مصطفیٰ ﷺ یا مجتبیٰ ﷺ میڈی ذات تے لکھاں سلام

اے سرور کون و مکاں میڈی ذات تے لکھاں سلام

اے مقتدائے انس و تجاں میڈی ذات تے لکھاں سلام

اے خاتم پیغمبراں اے سب رسولاں دے امام

اے نورِ جاں اے جانِ جہاں اے خاصہ ربِ انام

یا مصطفیٰ ﷺ یا مجتبیٰ ﷺ میڈی ذات تے لکھاں سلام

بگڑی ہوئی تقدیر اے۔ اج امٹِ اسلام دی

رو داد سن اے یانہی ﷺ مظلومی خدام دی

یا مصطفیٰ ﷺ یا مجتبیٰ ﷺ میڈی ذات تے لکھاں سلام

توفیق امن و عافیت ہر دوست تے دشمن کوں دے

فردوس دی شادابیاں اسلام دے گلشن کوں دے

یا مصطفیٰ ﷺ یا مجتبیٰ ﷺ میڈی ذات تے لکھاں سلام

تشریف عرشِ پاک توں امت دی جانب لایے

تسکین دیون واسطے سرکار ﷺ جلدی آئے

یا مصطفیٰ ﷺ یا مجتبیٰ ﷺ میڈی ذات تے لکھاں سلام

پروفیسر سعیدہ رشم

صلی اللہ  
علیہ وسلم

سلام آ کھاں سلام آ کھاں محمد ﷺ نوں سلام آ کھاں  
رسول آ کھاں امام آ کھاں محمد ﷺ نوں سلام آ کھاں

پرو کے نال ہنجاواں دے دروداں دے ایہ پھل سارے  
صبح آ کھاں تے شام آ کھاں محمد ﷺ نوں سلام آ کھاں

کریں توں پیش روضے تے مری حسرت ہوائے فی  
تینوں میں ایہ پیام آ کھاں محمد ﷺ نوں سلام آ کھاں

رضا دے وانگ لے جاواں ایہ سوہنے پھل لفظاں دے  
پڑھاں نعتاں کلام آ کھاں محمد ﷺ نوں سلام آ کھاں

میں چم کے خاک روضے دی تے سینے لا کے جالی نوں  
سلیم عرضاں تمام آ کھاں محمد ﷺ نوں سلام آ کھاں  
سلیم آفتاب سلیم

.....☆☆.....

صلی اللہ علیہ وسلم

آقا ﷺ میرے سلام" علیکم  
 شام سویرے سلام" علیکم  
 عرشاں فرشاں اتے آقا ﷺ  
 تیرے پچیرے سلام" علیکم  
 سدہ توں وی اگے جا کے  
 تیرے ڈیرے سلام" علیکم  
 کل نمایاں توں بدنی تیرے  
 شان . اچیرے سلام" علیکم  
 تیرے آیاں مکے جگ توں  
 کفر ہنیرے سلام" علیکم  
 تیری ذات مبارک اتے  
 ہون بتیرے سلام" علیکم  
 پتھر جھل کے دعاواں کیتیاں  
 تیرے جیرے سلام" علیکم  
 شام سویرے آکھن شوکت  
 بردے تیرے سلام" علیکم

مہر شوکت علی شوکت

صلی اللہ  
علیہ وسلم

صبح کو لوں نوید لے کے  
صاف کر کے تے ذہن تائیں  
میں تینوں آقا سلام آکھاں  
وضو کرا کے  
میں نال، ہنجواں  
ایس اکھ تائیں  
میں تینوں آقا سلام آکھاں  
ڈب کے تیرے تصور اندر  
ہزاراں میلاں دا پندھ کر کے  
پہنچ کے خواباں دے وچ مدینے  
میں تینوں آقا سلام آکھاں

صابر چشتی

## صلی اللہ علیہ وسلم

میں روز سردار انبیاء ﷺ نوں مدینے جا کے سلام آہناں  
بڑے ادب تھیں میں ہتھ بندھ کے سر جھکا کے سلام آہناں

میں روز حضرت ﷺ دی دید کارن ہزاراں میلاں دا سفر کرناں  
میں روز بطحا دی پاک مٹی نوں سر وچ پا کے سلام آہناں

میں روز وہناواں اپنے آقا ﷺ دے نور بھرویں حسین جلوے  
تے روز آقا ﷺ دے جوڑیاں نوں میں ہتھ لا کے سلام آہناں

اوہ روز میرے تے پن کر دے اوہ روز میرے تے دان کر دے  
میں روز قسمیں خدا دی دتا اوہناں دا کھا کے سلام آہناں

میں چپ کر کے خموش ہو کے حضور ﷺ اتے درود پڑھناں  
تے دو جہاناں دے بادشاہ نوں میں گنگنا کے سلام آہناں

نوید اوہناں دے پاک روضے دا نت جا کے طواف کرناں  
میں نت اوہناں دے گھر دے بوہے کھٹکھٹا کے سلام آہناں

صابر نوید



## صلی اللہ علیہ وسلم

جتھے پڑھو سلام نبی تے سن دے ہین حضور  
 رہویں سلام نبی نوں گھل دا دکھ ہون گے دور  
 ہو رہتھیرے تینوں اللہ دیوے گا انعام  
 سوہنے نبی تے لکھ سلام سوہنے نبی تے لکھ سلام

پڑھیں درود سلام جدوں وی رکھیں خاص خیال  
 شامل وچ درود تیرے دے رہوے نبی دی آل  
 آل دا دامن چھڈ دتا تے ہوویں گا ناکام  
 سوہنے نبی تے لکھ سلام سوہنے نبی تے لکھ سلام

صائم ایہہ ہے پاک نبی دی پاک حدیث کمال  
 وچ درود دے شامل میرے نال ہے میری آل  
 پڑھو درود تے ہو جاندی اے مشکل حل تمام  
 سوہنے نبی تے لکھ سلام سوہنے نبی تے لکھ سلام

صائم چشت

## صلی اللہ علیہ وسلم

میں دو جہانوں دے بادشاہ تے درود پڑھناں سلام کہناں  
 خدا دے محبوب مصطفیٰ ﷺ تے درود پڑھناں سلام کہناں  
 خدا جہدے تے درود بھیجے اوہدے نہیں سمھناں توں عالی رتبے  
 جناب احمد مصطفیٰ ﷺ تے درود پڑھناں سلام کہناں  
 اوہ ہتھ پتھماں دے سرتے دھر دے غلام اتے وی رحم کر دے  
 غریب لوکاں دے ہمنوا تے درود پڑھناں سلام کہناں  
 حضور ﷺ رہبر حضور ﷺ منزل حضور ﷺ افضل حضور ﷺ کامل  
 حضور ﷺ سردار انبیاء تے درود پڑھناں سلام کہناں  
 رسول ﷺ ہادی رسول ﷺ آقا رسول ﷺ سرور رسول ﷺ مولا  
 رسول ﷺ پیارے دی ہر ادا تے درود پڑھناں سلام کہناں  
 نبی ﷺ طہ نبی ﷺ شفاعت نبی ﷺ مدثر نبی ﷺ اے رحمت  
 حضور ﷺ اللہ دے دربار تے درود پڑھناں سلام کہناں  
 مدینے والے معراج والے حضور ﷺ بخشش دے تاج والے  
 اس اپنی امت دے ناخدا تے درود پڑھناں سلام کہناں  
 حضور ﷺ اعلیٰ حضور ﷺ برتر حضور ﷺ اول حضور ﷺ آخر  
 ہر اک زمانے دے رہنما تے درود پڑھناں سلام کہناں  
 طلب نبی ﷺ دی لگی اے دل نوں تے جند وی صحرائی ترلے لیدی  
 میرا ایسے لئی شاہ دوسرا تے درود پڑھناں سلام کہناں  
 صحرائی گورداسپوری

## صلی اللہ علیہ وسلم

مدینے دی بہاراں تے فضاواں نوں سلام آکھاں  
 سنبھا لے کے جاون جو ہواواں نوں سلام آکھاں  
 مدینے جان دی سدھر کدے جے پوری ہو جاوے  
 جے ہو جاوے کرم آقا ﷺ عطاواں نوں سلام آکھاں  
 تری گلیاں دے وچ جینا تری گلیاں دے وچ مرنا  
 ترے نیڑے جو لے جاون اوہ راہواں نوں سلام آکھاں  
 پسینے دی تری خشبو بسی اے ذرے ذرے وچ  
 جہاں تھاواں توں توں لنگھیا اوہ تھاواں نوں سلام آکھاں  
 مرے حرفاں دا نذرانہ توں سجنا! نال لیندا جا  
 مدینے جانڈیا راہیا میں چاواں نوں سلام آکھاں  
 سبھے پتھر سی پر بلھاں تے آئی بددعا ناہیں  
 جو دشمن واسطے منگیاں دعاواں نوں سلام آکھاں  
 تسلیں محبوب او رب دے تسلیں سوہنے جہاناں توں  
 ترے ناں توں ایہ جند واراں 'قضاواں نوں سلام آکھاں  
 مدینے ول کوئی جاوے مدینے توں کوئی آوے  
 کھڑا اوہناں دی راہ ویکھاں تے راہواں نوں سلام آکھاں  
 بڑی عزت ملی جد دی پڑھی اے نعت میں تیری  
 ترے قمری نوں جو ملیاں جزاواں نوں سلام آکھاں  
 ڈاکٹر محمد طارق قمری

## صلی اللہ علیہ وسلم

کہندیاں نہیں سوچاں وچاراں سلام  
 اے محمد ﷺ کروڑاں ہزاراں سلام  
 اس عاجز کمینے دا کرنا قبول  
 اے مکی مدنی سرکاراں ﷺ سلام  
 ہواواں فضاواں چ اڈدے پکھیرو  
 کہندے نہیں بن بن کے ڈاراں سلام  
 تیری حیاتی دے پل پل تے پڑھیا  
 مدینے دی گلیاں بازاراں سلام  
 ادبوں تعظیموں جھک جھک کے آکھن  
 باغاں دے اندر بہاراں سلام  
 کیہڑا پڑھے گا جیوں کر پڑھے نہیں  
 کر بل دے جان نثاراں سلام  
 آوے اوہ ویلا کہ سوئے نبی ﷺ توں  
 اے محسن میں ساہواں دے واراں سلام

صلی اللہ  
علیہ وسلم

مسافر مدینے دے قربان جاواں در مصطفیٰ تے سلام عرض کرنا  
کدی اس گدا دی وی فریاد سن لو مرا بس اتنا پیام عرض کرنا  
در مصطفیٰ تے سلام عرض کرنا

دو عالم تے رحمت دے نہیں ابر چھائے کدی اس گدا نوں وی درتے بلا لے  
کتے ہجر وچ ایہ مرای نہ جائے عطا وصل دا اس نوں جام عرض کرنا  
در مصطفیٰ تے سلام عرض کرنا

دنیا دی شاہی نہ دولت ای چاہواں بناں دید تیری نہ مرکدھرے جاواں  
میں دن رات کروا ہاں ایہو دعاواں گداواں چ میرا وی نام عرض کرنا  
در مصطفیٰ تے سلام عرض کرنا

تیرے درتے جان دے نہیں لکھاں سوالی جیہڑے خوش بخت تے مقدر نہیں عالی  
جھولی گدا دی کیوں اج تک ہے خالی کدی اس نوں وی فیض عام عرض کرنا  
در مصطفیٰ تے سلام عرض کرنا

جنت توں ودھ کے تے ہیں اوہ گلیاں جتھے سوہنے ماہی لائیاں نہیں تلیاں  
میرے دل دی خواہش مراں او تھے جا کے میرا عاصی اتنا ہی کام عرض کرنا  
در مصطفیٰ تے سلام عرض کرنا

عبدالرشید عاصی



## صلی اللہ علیہ وسلم

یا نبی ﷺ اے سرور الصلوٰۃ والسلام یا حبیب ﷺ کبریا الصلوٰۃ والسلام  
 اے چراغ دو جہاناں روشن کیا اے سب جگ توں  
 ہر تھاں ظاہر جلوہ تیرا الصلوٰۃ والسلام  
 اول کیا رب سچے نے آقا ﷺ ظاہر تیرا نور  
 توں نہ ہوندا کچھ نہ ہوندا الصلوٰۃ والسلام  
 ظاہر کر کے تیرا نور آپ وی عاشق ہو گیا  
 اے حسیں کل حسن دے مالکا الصلوٰۃ والسلام  
 آپ سجایا تینوں رب نے تیری مثل نہ کوئی ہو  
 سب توں اعلیٰ سب توں بالا الصلوٰۃ والسلام  
 عرش فرش تے لوح قلم ساری خدائی پڑھ رہی  
 آپ پڑھدا اے خدا الصلوٰۃ والسلام  
 شجر ہجرتیوں کرن سلاماں بحر و بر تیرا جپ دے ناں  
 کر تعظیم اے کعبہ کہندا الصلوٰۃ والسلام  
 گئے معراج نوں عرشاں اتے براق تے بہہ کے جد سرکار  
 ودھ کے عرش معلیٰ کیا الصلوٰۃ والسلام  
 صحابی تیرے چن تے تارے عاشق تیرے بے مثال  
 حیاتی ساری جہاں پڑھیا الصلوٰۃ والسلام  
 عبدالرشید ملتانی۔ قصور

## صلی اللہ علیہ وسلم

نبی ﷺ دے قدماں دے وچ کھلوکے پڑھاں درود و سلام لکھاں  
 میں ایہناں اکھیاں دے بوہے ڈھوکے پڑھاں درود و سلام لکھاں  
 میں دیکھاں جا کے اوہ روضہ عالی ہے جتھے وسدا دو جگ دا والی  
 میں لا کے اکھیاں دے نال جالی پڑھاں درود و سلام لکھاں  
 ہے نبیاں دا اوہ امام سوہنا ہے پایا سوہنے مقام سوہنا  
 میں لے کے سوہنے دا نام سوہنا پڑھاں درود و سلام لکھاں  
 میں دل دے وچ نیں ایہ تاہنگاں رکھیاں مدینے جاواں میں نال سکھیاں  
 جاں دوروں دیکھن اوہ روضہ اکھیاں پڑھاں درود و سلام لکھاں  
 ہے جتھے بھردے نیں خالی کاسے تے غمزداں نوں ملن دلا سے  
 میں پھر کے روضے دے آسے پاسے پڑھاں درود و سلام لکھاں  
 مدینے والے دے درتے جا کے سناواں دکھڑے میں گڑ گڑا کے  
 میں سرنوں قدماں دے وچ جھکا کے پڑھاں درود و سلام لکھاں  
 اے آقا جے توں کرم کماویں تے کدی نیازی نوں وی بلاویں  
 میں سداوے گنبد دی بہہ کے چھاویں پڑھاں درود و سلام لکھاں

عبدالستار نیازی

ﷺ

طیبہ دے پر کیف منظر تے بہاراں نوں سلام  
 گنبد خضریٰ دیاں اطہر دیواراں نوں سلام  
 نال لے کے یاراں نوں پھر دے سی جتھے مصطفیٰ ﷺ  
 اوہناں گلایاں اوہناں تھاواں تے بازاراں نوں سلام  
 حضرت صدیقؓ تے فاروقؓ عثمانؓ و علیؓ  
 کملی والے شہنشاہ ﷺ دے چوہاں یاراں نوں سلام  
 جو ناموس مصطفیٰ ﷺ دے واسطے ہوئے شہید  
 اوہناں شانناں والیاں سب جانثاراں نوں سلام  
 جتھے ہمیں رووندا امت دے لئی سوہنا نبی ﷺ  
 ہون اوہناں ساریاں خوش بخت غاراں نوں سلام  
 کملی والے ﷺ دے جو پہلو وچ نیازی دسدیاں  
 نازاں بھریاں نال تریں دونہ مزاراں نوں سلام  
 الحاج عبدالستار نیازی

## صلی اللہ علیہ وسلم

مرے آقا ﷺ محبت دی اداواں نوں سلام ہووے  
 غریباں نال الفت دی صداواں نوں سلام ہووے  
 مراد دل جان آقا ﷺ اے مری نسبت وی سوہنے دی  
 یتیمیاں تے جو آقا ﷺ دی نگاہواں نوں سلام ہووے  
 مرے لب برد کردے نیں دروداں تے سلاماں دا  
 مرے محبوب آقا ﷺ دی وفاواں نوں سلام ہووے  
 اڈیکاں لا کے بیٹھا ساں بلاوا کملی ﷺ والے دا  
 مرے ناویں جو لے آئیاں ہواواں نوں سلام ہووے  
 پریشاں سارا دن لنگھے ایہ کالی رات تڑپاوے  
 مرے تے خاص آقا ﷺ دی عطاواں نوں سلام ہووے  
 نہ چارا گر سوا اوہدے نہ سوچاں دا ای وں چلے  
 کرو منظور ہن آقا ﷺ دعاواں نوں سلام ہووے  
 ایہ عاجز تے فقیراں دے تے سہا ہندے پروہنے نیں  
 جے ویکھاں آپ دا روضہ تے چاواں نوں سلام ہووے  
 ہے قاضی عشق آقا ﷺ دے مرے سینے چ اگ لائی  
 رہوے مچدی سدا شمالا تے ہاواں نوں سلام ہووے  
 عبداللہ قاضی

صلی اللہ  
علیہ وسلم

سلام آ کھاں نی سوہنے تے پیارے نوں سلام آ کھاں  
سلام آ کھاں شہنشاہ دو عالم دے ستارے نوں سلام آ کھاں  
حدیثاں و سدیاں سانوں کہ جن تیرا کھلونا سی  
میں نوری اس چنگھوڑے دے ہلارے نوں سلام آ کھاں  
ادب تیرا جیہڑا بگھیاڑاں نے کیتا عجب کیتا  
شیماء دے فکراں وچ ڈبے ہوکارے نوں سلام آ کھاں  
غربی تے قیمی دے تہاں آ اتھرو پونجے  
پتیماء تے غریباں دے سہارے نوں سلام آ کھاں  
شب معراج رب نے والہانہ ایہ سی فرمایا  
میرے محبوب عرشاں دے دلارے نور سلام آ کھاں  
امت دے واسطے غاراں دے وچ روندے رہے راتاں  
امت دے دکھاں درداں دے سہارے نوں سلام آ کھاں  
اوہ اتلی نور دا تارا جو جبرائیل نے تکیا  
ترے متھے چچ چمکدے نوری تارے نوں سلام آ کھاں  
مدینے پاک دی عزت ادب عظمت مرے دل وچ  
ایہو جی کھدا میرا شہر سارے نوں سلام آ کھاں  
تصور وچ جدوں میں آپ دے روضے تے جاناواں  
سکوں دیندا اے جو میں اس نظارے نوں سلام آ کھاں  
پڑھو صل اللہ علیہ وسلم نیام رحمت تے  
ایہ بخشس واسطے سائلک دے چارے نوں سلام آ کھاں

عثمان سائلک مہروی



صلی اللہ  
علیہ وسلم

دروود آکھناواں سلام آکھناواں  
 میں آقا نوں صبح تے شام آکھناواں  
 مدینے دے ساقی توں مل جائے پی کے  
 میخانے نوں لکھاں سلام آکھناواں  
 ابوبکرؓ و عمرؓ و عثمانؓ و حیدرؓ  
 مدینے دے میکش تمام آکھناواں  
 مدینے دے ساقی توں جس رند نے پیتی  
 میں اسنوں نوں وی لکھاں سلام آکھناواں  
 ہتھ رکھ کے سینے تے سرنوں جھکا کے  
 سوہنے دا خود نوں غلام آکھناواں  
 کدی مشکلاں مشکلاں رہندیاں نہیں  
 میں آقا دا جد لے کے نام آکھناواں  
 صبح شام درود و سلام آقا  
 عقیدت دا پی کے جام آکھناواں  
 لکھاں دروداں تے سالک سلاماں  
 مرشد دا لے کے نام آکھناواں  
 عثمان سالک مہروی

ﷺ

میں ہنجوآں دے ہتھیں گھلے تیرے ولے  
دروداں دے گجرے سلاماں دے پھل  
اے ختم الرسل ﷺ ہادی کل

ایہو تحفے نیناں دے پلے جیہڑے گھلے  
دروداں دے گجرے سلاماں دے پھل  
اے ختم الرسل ﷺ ہادی کل

ماہی جس نوں چٹھیاں پاوے اوہ ماہی دے گھر جاوے  
اسدے پیارو کرم سونے بدھے پلے  
دروداں دے گجرے سلاماں دے پھل  
اے ختم الرسل ﷺ ہادی کل

جیہڑیاں ماہی دے من بھاوے ہار سنگھار اوہ لا لا جاوے  
لکھ ہزاراں اوہناں دے پلے لے لے چلے  
دروداں دے گجرے سلاماں دے پھل  
اے ختم الرسل ﷺ ہادی کل

قافلیاں دے قافلے جاوے میریاں اکھیں نیر وگاوے  
رکھ امیدیاں سالک جھلے ماہی ولے  
دروداں دے گجرے سلاماں دے پھل  
اے ختم الرسل ﷺ ہادی کل

عثمان سالک مہروی

## صلی اللہ علیہ وسلم

خواہش ہے دل دی مدینے میں جاواں سلام آکھ آواں  
 مدینے دی گلیاں چ پلکاں وچھاواں سلام آکھ آواں  
 اوہ گنبد وی ویکھاں جنہوں ویکھنے لئی فرشتے وی آون  
 تے جالی سنہری نوں سینے میں لاواں سلام آکھ آواں  
 اوہ رکھے جے سوہنا نصیب ایڈا چنگا کسے دا کیہ ہونا  
 ایہ جشہ اوہدے در دا کتا بناواں سلام آکھ آواں  
 جدوں دا مدینے دے خیالاں چ ڈبیا میں ہر ویلے رہناں  
 نہ ویکھن مرے دل کدی وی بلاواں سلام آکھ آواں  
 میں سنیا اے سونا مدینے دی مٹی توں ودھ کے نہیں ہونا  
 مدینے دی مٹی نوں سرمہ بناواں سلام آکھ آواں  
 مدینے نوں جاندا کسے نوں میں ویہناں تڑفدا ای رہناں  
 کروہن تے منظور آقا ﷺ دعاواں سلام آکھ آواں  
 علی شان سنیا! اوہدا در ہے ایسا جتھے ہر وقت ای  
 ہوون دور دکھڑے تے مکن سزاواں سلام آکھ آواں

علی شان

## صلی اللہ علیہ وسلم

راہیا سوہنیا مدینہ جا کے تے میرا وی سلام آکھ دئیں  
 سوہنے روضے اگے سرنوں جھکا کے تے میرا وی سلام آکھ دئیں  
 گھڑی حاضری دی جس ویلے آوے گی سو نہد رب دی خدائی مل جاوے گی  
 اوتھے ہنجواں دے ہار بنا کے تے میرا وی سلام آکھ دئیں  
 سوہنے روضے اگے سرنوں جھکا کے تے میرا وی سلام آکھ دئیں  
 دس پین گے نظارے تینوں نور دے نیڑے جس ویلے ہوویں گا حضور دے  
 جالی چم کے سینے دے نال لا کے تے میرا وی سلام آکھ دئیں  
 سوہنے روضے اگے سرنوں جھکا کے تے میرا وی سلام آکھ دئیں  
 اوہناں پتھراں توں لوکی جند وار دے جہاں چم لئے پیر سرکار دے  
 اوہناں پتھراں دے پیریں ہتھ لا کے تے میرا وی سلام آکھ دئیں  
 سوہنے روضے اگے سرنوں جھکا کے تے میرا وی سلام آکھ دئیں  
 جا کے دیکھیں اوہدی مٹی خوش نصیب نوں جہے لوریاں سنائیاں سی حبیب نوں  
 متھے اتے اوس مٹی نوں سجا کے تے میرا وی سلام آکھ دئیں  
 سوہنے روضے اگے سرنوں جھکا کے تے میرا وی سلام آکھ دئیں  
 سکھ چین اوہ ظہوری ساڈی جان دار روضہ رب دے حبیب عالی شان دا  
 اوہدی چھاویں دکھ اپنا سنا کے تے میرے وی سلام آکھ دئیں  
 سوہنے روضے اگے سرنوں جھکا کے تے میرا وی سلام آکھ دئیں  
 محمد علی ظہوری

ﷺ

راہیا جاندیا مدینے مرا وی جا کے سلام کہنا  
 نبی ﷺ جی دے روئے دی دید خاطر تڑپ دا تیرا غلام کہنا  
 میرا سلام کہنا

سدا اے اکھیاں دا نیر جاری کدی تے آوے گی میری واری  
 بلاوا آوے جے حاضری دا تے بولے میرا وی نام کہنا  
 میرا سلام کہنا

ایہ آس لا بیٹھی آس نیری حضور پیاسی اے پیاس میری  
 تیرے کرم دی سویر منکدی مرے نصیباں دی شام کہنا  
 میرا سلام کہنا

مرے گناہواں دا جگ تے رولا میں ہویا لکھاں دے نالوں ہولا  
 تری نگاہ کرم جے ہووے نہ ہووے بدنام نام کہنا  
 میرا سلام کہنا

سنے اوہ میرے توں حال میرا نہ ہووے کوئی سوال میرا  
 نبی ﷺ دے در دا سوالی بن کے ایہ حال میرا تمام کہنا  
 میرا سلام کہنا

نبی ﷺ دی نعتاں دا فیض سارا کہ لگدا کوہجا وی سب نوں پیارا  
 ظہوری کجھ نہیں کلام کجھ نہیں بس اینجو میرا کلام کہنا  
 میرا سلام کہنا

محمد علی ظہوری



## صلی اللہ علیہ وسلم

مدینے دے ماہی سلام" علیک  
 دو جگ تیری شاہی سلام" علیک  
 گھل کے دروداں دے سہرے خدا نے  
 ہے ہستی سراہی سلام" علیک  
 نظر کر کرم دی مٹا میرے من تھیں  
 ایہ پاپاں دی کاہی سلام" علیک  
 حجر تے شجر نے رسالت دی آقا  
 ہے دتی گواہی سلام" علیک  
 سورج ستارے تے چن کیے روشن  
 تیری . ضیا ہی سلام" علیک  
 پتھراں دے بدلے جس نے سدا ہی  
 ہے منگی دعا ہی سلام" علیک  
 کجیں جو درتے غنی دے وی ولوں  
 آکھیں توں راہی سلام" علیک

عمر غنی

صلی اللہ  
علیہ وسلم

سلام آقا زباں تے جاری سلام کہناں سلام کہناں  
تھاڈے در دا میں اک بھکاری سلام کہناں سلام کہناں

ذکر تھاڈا ہے چین دل دا پیار تھاڈا قرار من دا نکھارتن دا  
میں جند گھولی ہے جان واری سلام کہناں سلام کہناں

اوہ پیارے تھاڈے محبوب ساڈے اصحاب آقا احباب آقا  
سکھائی جہاں ہے جاں نثاری سلام کہناں سلام کہناں

سارا جیون دعاواں منگیاں ہن عاصی امت بخشان خاطر  
ایہ امت تہانوں ہے ایڈی پیاری سلام کہناں سلام کہناں

مدینہ وتی دی ہر گلی جو فقیر پھردے ہن ادب دے قابل  
تہاں دی اکھ ہے پریم خمارِ سلام کہناں سلام کہناں

نہ کہھ ہے پلے سوا گنہاں میں کس نوں دساں میں کتھے جاواں  
سن لو میری وی گریہ زاری سلام کہناں سلام کہناں

عمر غنی

ﷺ

ہر دم پڑھو درود بیلو دم دم کہو سلام الصلوٰۃ والسلام  
اوہ رسول دے رسول ہن ہن نبیاں دے امام الصلوٰۃ والسلام

دوہاں جہاناں دے مکیناں واسطے کارن بنے نہیں جو دوستو! خیر دا  
ہن اوہ خیر الوریٰ خیر البشر خیر الانام الصلوٰۃ والسلام

سبز گنبد بیٹھ بہنہ کے پا سنہری جالیاں ساہنویں کھلو  
ہن سدا پڑھدے ہی رہندے انج آقا دے غلام الصلوٰۃ والسلام

راز گچھے کھول دیوے سبھ اچھے بندیاں لئی مولا کریم  
ہے بنایا ہی جہاں نے ایہ وظیفہ صبح شام الصلوٰۃ والسلام

دکھ پاروں عاصیاں دے رنا بہوں غاراں دے وچ سوہنا نبی  
بخشش اوہناں دی واسطے ہے رات بھر کیتا قیام الصلوٰۃ والسلام  
عمر غنی

ﷺ

روون آساں تے سدھراں چیکن سلام آقا سلام آقا  
ہونٹھ میرے پئے شہد ڈیکن سلام آقا سلام آقا

تھاڈے ناں دا ای سو بھلا ہے چودھار جگ تے میرے کریم  
چو فیر مہکاں نیں کھلرا ہووے پکھر جیکن سلام آقا سلام آقا

نکما نارا میں عیمیں بھریا جدوں وی اتھے صلوٰۃ پڑھناں  
تدوں ای جکن تھاڈے تیکن سلام آقا سلام آقا

ناؤں میرا کرم تھیں تھاڈے ہے شامل نعت لکھاریاں وچ  
مقدر میرے نہ بدن کیکن سلام آقا سلام آقا

نظر سولی جے اک وی پاؤ تاں پٹھیاں وگیاں وی سہیاں ہوون  
انج تاں امتی نہ جانے کیہ کیہ حضور ﷺ لیکن سلام آقا سلام آقا  
عمر غنی

صلی اللہ  
علیہ وسلم

رحمتِ دو جہاں تے ہزاراں سلام شافعِ امتاں تے ہزاراں سلام  
سیدِ انس و جاں تے ہزاراں سلام سرورِ سروراں تے ہزاراں سلام  
درد و نڈے جھٹھے دکھی انسان دے چارۂ بے کساں تے ہزاراں سلام  
اپنے ہر امتی دا جو غمخوار ہے سیدِ مہرباں تے ہزاراں سلام  
آپ دے ہر بیاں تے کروڑاں درود مصطفیٰ دی زباں تے ہزاراں سلام  
صرف اوہناں دی خاطر بنے دو جہاں باعثِ کن فکاں تے ہزاراں سلام  
ویکھیا سبز گنبد تے ٹھنڈ پے گئی صاحبِ آستاں تے ہزاراں سلام  
ہتھ اوہناں دے ہے لاجِ محشر دے دن شافعِ عاصیاں تے ہزاراں سلام  
را وکھایا ہدایت دا سرکار نے رہبرِ گرہاں تے ہزاراں سلام  
عظمتاں آپ تے پڑھدیاں نیں درود خاتمِ المرسلان تے ہزاراں سلام

ہون نازش درود آپ تے بے شمار

مرسلِ ہر زماں تے ہزاراں سلام

قاری غلام زبیر نازش



درود سادے برے ملا ہوا ہے  
۱۵۱  
صلی اللہ علیہ وسلم

نبی ﷺ دی صفتاں کر بندی ہوئی ہر اک زباں نوں سلام ہووے  
نویں زمانے دی لاج رکھدے ہوئے بیاں نوں سلام ہووے

اوہناں دا صدق و صفا مثالیٰ رتبہ اوہناں دا سب توں عالی  
خدا دے محبوب تے مجسم بنے قرآن نوں سلام ہووے

نبی ﷺ دے در دی غلامی بدلے بلالؓ تینوں جو رتبہ ملیا  
تیرے مقدر تے ریس آندی تیری ازاں نوں سلام ہووے

صنم کدہ ہے جہان سارا حسینؑ جے مرد حر دی لوڑ اے  
نبی ﷺ دی عظمت تے کٹ گئے ہر اک جواں نوں سلام ہووے

ایہ روشنی دا مینار بنے نوں خیالاں دی راہ بچھا دے  
نجفؑ مدینے تے کربلا دے نوں جہاں نوں سلام ہووے

نبی ﷺ دی امت دی خیر خواہی دے خواب ویکھے جواو کڑاں وچ  
ہر اک شعوری تے لاشعوری بھلے گماں نوں سلام ہووے

بڑی تمنا اے میرے دل وچ میں جا کے دیکھاں صفاتے مروہ  
ہووے نگا ہواں چ سبز گنبد تے اوس سماں نوں سلام ہووے

لہو دے تسیاں دے لئی وی آقا ﷺ نے رحمتاں دی نوید آندی  
فتح مکہ دے ویلے سبھ نوں دتی اماں نوں سلام ہووے

رخش دے شاہسوار جیہڑے مدینے دی راہ تے گامزن نیں  
اوہناں دے ہتھاں دے کوچ پھڑی ہوئی ہر اک عنان نوں سلام ہووے

مدینہ مکہ ہے چین دل دا وطن نبی ﷺ دا ہے ارضی جنت  
نبی ﷺ دی دھرتی تے وسدی گوٹھاں تے ہر گراں نوں سلام ہووے

ایہو اے ویلا جو اپنے ترکش دے تیر سارے چا آزمایے  
اسلام دشمن تے تن گئی جو ہر اک کماں نوں سلام ہووے

جس دے اوصاف دا صحیفہ رب تعالیٰ رقم چا کیتا  
اسری دے پاندھی تے والی و کون و مکاں نوں سلام ہووے

حسن یوسف تے دم عیسیٰ دے معجزے اوس وچ مجتمع نیں  
خدا دے اوس آخری نبی ﷺ نالے شہِ خواباں نوں سلام ہووے

ڈاکٹر غلام شبیر رانا

## صلی اللہ علیہ وسلم

محمد ﷺ دوارے سلام آکھدے نیں

ایہ سارے دے سارے سلام آکھدے نیں

خدا بھی فرشتے بھی حوراں تے غلاماں چہندے پرندے تے ایہ جن و انساں

ایہ خشکی تری ہوو جنگل گلستاں ایہ ارض و سماں دے مناظر بہاراں

ایہ اللہ دے پیارے سلام آکھدے نیں

ایہ سارے دے سارے سلام آکھدے نیں

ایہ اک لکھ ہزاراں نبی پیارے پیارے تری آل اولاد اصحاب سارے

ولی اولیا تے قطب غوث سارے ایہ چارے کتاباں تے قاعدے سیپارے

ایہ شاہد نیں بھارے سلام آکھدے نیں

ایہ سارے دے سارے سلام آکھدے نیں

ایہ اسرار پوشیدہ ارض و سماں دے ایہ دلکش تے رنگین جلوے فضا دے

ایہ مستانہ جھونکے جو بادِ صبا دے ایہ وحدت دے مظہر کرشمے خدا دے

ایہ سندر نظارے سلام آکھدے نیں

ایہ سارے دے سارے سلام آکھدے نیں

ترے درتے چکر ایہ شمس و قمر دے شب و روز پھیرے ترے لان گھر دے

میں نظراں چوں دیکھے نیں اکثر گزردے تماشے رنگا رنگ علم و ہنر دے

ایہ کر کر اشارے سلام آکھدے نیں

ایہ سارے دے سارے سلام آکھدے نیں

حکیم غلام مصطفیٰ طالب ناصری

## صلی اللہ علیہ وسلم

مصطفیٰ تے پڑھو درود و سلام بے حسابے پڑھو درود و سلام  
 چل دیاں پھر دیاں وظیفہ کرو اٹھ دے بہندے پڑھو درود و سلام  
 ہتھ بنھ کے نیاز مندی نال سر جھکا کے پڑھو درود و سلام  
 شاد ہو کے حضور سن دے نہیں بھاویں کتھے پڑھو درود و سلام  
 شرع ولوں منع منا ہی نہیں جیہڑے صیغے پڑھو درود و سلام  
 جد دی یارو کوئی دعا منگو اگے کچھے پڑھو درود و سلام  
 رات دن ایس دھن ج مست رہو اٹھے پہرے پڑھو درود و سلام  
 جس گھڑی کوئی چیز بھل جاو اوں ویلے پڑھو درود و سلام  
 آل اصحاب تے عقیدت نال رل کے سارے پڑھو درود و سلام  
 جتھوں فیضان خیر پیندی اے اس جنا بے پڑھو درود و سلام  
 فیض رسول فیضان



صلی اللہ  
علیہ وسلم

آفتاب رسالت تے لکھاں سلام تاجدارِ نبوت تے لکھاں سلام  
 دو جہاناں دی رحمت تے لکھاں سلام مصطفائی دی عظمت تے لکھاں سلام  
 والہی مکھڑے والے تے لکھاں درود اوہدی من موہنی صورت تے لکھاں سلام  
 جس دے در دی غلامی فرشتے کرن اوس آقا دی شوکت تے لکھاں سلام  
 رشتہ خالق دا مخلوق نال جوڑیا کملی والے دی نسبت تے لکھاں سلام  
 جس دا کافر وی اقرار کر دے رہے اس صداقت امانت تے لکھاں سلام  
 زیر کر دتا ہر اک شہ زور نوں ایسی روحانی طاقت تے لکھاں سلام  
 گلاں سن کے وی جیہڑے دعاواں کرن میرے آقا دی عادت تے لکھاں سلام  
 اس دے ویج گھر خدا دا بنایا گیا شہر مکے دی حرمت تے لکھاں سلام  
 سب شفاواں دا ضامن ہے جس دا غبار اوس مدینے دی عظمت تے لکھاں سلام  
 حشر دے دن قمر دی شفاعت کرن ایس شفقت عنایت تے لکھاں سلام

قمریہ دانی



صلی اللہ  
علیہ وسلم

لباں تے تساں دا نام ہووے  
ہر اک صبح ہر اک شام ہووے  
رحمت رب دی اوں تے عام ہووے  
جیہڑا پڑھدا صلوٰۃ و سلام ہووے  
جیہڑا تساں دی بزم سجاوندا اے  
ملدا اوہنوں ای عشق انعام ہووے  
تسیں اوہدے سفنے چ آؤ جد وی  
اوہ پڑھدا صلوٰۃ و سلام ہووے  
اوہ سجنو! جگ دا سلطان ہووے  
کلی والے دا جیہڑا غلام ہووے  
ہندا آقا دا اوہو غلام جیہڑا  
ہردم پڑھدا صلوٰۃ و سلام ہووے  
ایں عیبی تے کرم جے عام ہووے  
پیندا ایہ وی تے زمزم دا جام ہووے  
ہووے ساوے گنبد دی چھاں آقا  
پڑھدا کاشف صلوٰۃ و سلام ہووے  
جدوں آیا موت پیغام ہووے  
کاشف لکھدا نعت کلام ہووے  
ایہدی قبر چ جد وی آؤ آقا  
بس ایہ پڑھدا صلوٰۃ و سلام ہووے  
کاشف کلیل کاشف

ﷺ

حضور اکرم دی ہر ادا تے سلام آکھو  
کلیم! مولا دے دلربا تے سلام آکھو

جہان سارا ہنیریاں نے سی گھیر لیا  
سور بخشی جس ضیاء تے سلام آکھو

جو سایہ کردی اے پاک روضے دے عین اتے  
خدا دی رحمت دی اس گھٹا تے سلام آکھو

درو پڑھدے جو ساوے گنبد تے عرشوں آکے  
فرشتیاں دی بھلی صدا تے سلام آکھو

جہاں نے تکیا سی روپ آقا دا نال اکھیں  
مدینے جا کے ہر ایک جا تے سلام آکھو

کلیم! نیراں دی بولدا جو زبان راتیں  
نیا دے سوہنے جھے اس گدا تے سلام آکھو  
کلیم شہزاد

## صلی اللہ علیہ وسلم

خدائی نور تے عرشاں دے تارے نوں سلام آکھاں  
 رسول اللہ ﷺ حبیب اللہ ﷺ پیارے نوں سلام آکھاں  
 جیہدی رحمت دا مینوں آسرا روزِ حشر یارو  
 میں اس آساں دے محور نوں سہارے نوں سلام آکھاں  
 جیہدی تخلیق دے صدقے بنے ارض و سما سارے  
 اوہدی صورت نورانی نوں شہپارے نوں سلام آکھاں  
 عطا ہوئی اے شاہی جیس دے در تے گداواں نوں  
 اوہدے در دے گداواں نوں دوارے نوں سلام آکھاں  
 فرش توں عرش تیکر پھیلیاں تھاواں تے راہواں نوں  
 شب اسری دے ہر منظر نظارے نوں سلام آکھاں  
 کراں قربان تن من نوں لٹا دیواں حیاتی نوں  
 کدی آوے بلارا تے بلارے نوں سلام آکھاں  
 جہاں نعتاں دے راہیں کیتی ثنا خوانی لکھاری نے  
 معراجا اوس نعتاں دے پٹارے نوں سلام آکھاں

## صلوٰۃ علیہ

رحمت رب دا وسدا ابر بہار صلوٰۃ سلا ماں  
 صاف کرن شیشے دا غین غبار صلوٰۃ سلا ماں  
 شہر مدینے سدیا جاوے اک نہ اک دن جیہڑا  
 ڈالیاں بھر بھر گھلے وچ دربار صلوٰۃ سلا ماں  
 مہر وفا دی دولت بخشن خالی جھولیاں تائیں  
 بے زر نوں کر دیون زردار صلوٰۃ سلا ماں  
 لات منات سواہ کر چھڈن حرم حریم دلاں دے  
 وحدت برقوں تیج جواہردار صلوٰۃ سلا ماں  
 راہوں پین کراہ نہ دیون ڈونگھیاں پینڈیاں اندر  
 نہیریاں راتاں وچ مشعل بردار صلوٰۃ سلا ماں  
 مست الست دھیان بناون محرم ذکر و فکر  
 غافل تائیں کرن عجب ہشیار صلوٰۃ سلا ماں  
 افلاکاں دیاں کھلاں اندر دن کیویں اڈنا  
 بے پر نوں کر دیندیاں نیں پردار صلوٰۃ سلا ماں  
 ایہ بخشش دا پاک وسیلا سندر سوہنا حیلہ  
 ہولا کردیاں نیں سینے دا بہار صلوٰۃ سلا ماں  
 پچھلیاں راتیں اندر جدوی نیناں دے کھوہ جوئے  
 کھڑکھڑ ہسیدیاں بن کے گل گلزار صلوٰۃ سلا ماں

اوہنوں ڈرتے خوف نہ کوئی شوہ دریاواں کولوں  
 جس دی بیڑی تے جس دی تہوار صلوٰۃ سلاماں  
 ایہناں دی مرضی بن کھل دا قفل کدے نہ دل دا  
 ایس قلعے دیاں نیں کنجی بردار صلوٰۃ سلاماں  
 روحانی جسمانی مرضاں لئی پیغام شفا دا  
 چنگے ہون پڑھن جدوں بیمار صلوٰۃ سلاماں  
 بیشک ایس دی خیر تے برکت محض درود نبی ﷺ دا  
 ”حزب البحر“ دا سارا ہار سنگھار صلوٰۃ سلاماں  
 ہر منظر اپنے پس منظر نال دکھائی دیوے  
 اکھیاں دل دیاں کرن جدوں بیدار صلوٰۃ سلاماں  
 ٹوئے بے راہ طلب دے مول نہ رہندے باقی  
 تاہموار زمین کرن ہموار صلوٰۃ سلاماں  
 ”طلع البدر علینا“ پایا میں ایہناں دے صدقے  
 کیف کرامت دا سوہنا اظہار صلوٰۃ سلاماں  
 لوکاں اندر خوب جگاون پیارتے حب نبی ﷺ دی  
 نعت محل وچ کرن جدوں دربار صلوٰۃ سلاماں  
 وچ تصور خالد لکھن رخ رخسار نبی ﷺ دے  
 سوہنے نقش اکھیڑن نقش نگار صلوٰۃ سلاماں

ﷺ

پیامبر جو اجالیاں دا سلام اوہنوں  
 منارا اچا جو عظمتاں دا سلام اوہنوں  
 پکاریاں نام جس دا بھٹکے مسافراں نوں  
 سراغ ملدا اے منزلاں دا سلام اوہنوں  
 سلوک سمھناں دے نال اکو جھیا سی جدا  
 جہاں تے منبع جو شفتتاں دا سلام اوہنوں  
 مقام اچا نصیب ہويا اے نوریاں توں  
 عظیم محسن جو خاکیاں دا سلام اوہنوں  
 طواف کردے نیں عرش والے زمین والے  
 پلے پلے جس دے آستاں دا سلام اوہنوں  
 تمیز جھنہ غلام آقا دی ختم کیتی  
 مٹایا جس رن رنگتاں دا سلام اوہنوں  
 بنے گا منظور حشر دے دن سفارشی جو  
 اساڈے ورگے نماںیاں دا سلام اوہنوں

منظور وزیر آبادی



## صلی اللہ علیہ وسلم

کل انبیاء دے سردار نوں میرا سلام ہووے  
دو جہاں دے وفادار نوں میرا سلام ہووے

کائنات دے والی دی عطا میرے تے رہندی اے  
بہاراں دی اس مہکار نوں میرا سلام ہووے

آقا دے گرم نال سی کمزور ڈاچی چل پئی  
شاہاں دے شہسوار نوں میرا سلام ہووے

آیا اے بن کے آسرا میرے جے گنہگار دا  
اوس مکی مدنی سرکار نوں میرا سلام ہووے

رکھناواں طلب جس دے درتے میں جان دی  
شاہد اس ولدار نوں میرا سلام ہووے

ڈاکٹر مہر دین شاہد

صلی اللہ علیہ وسلم

سید ابرار نوں لکھاں سلام  
احمد مختار نوں لکھاں سلام  
جو یتیمیاں دا بڑا غمخوار سی  
اوس دے گھر بار نوں لکھاں سلام  
جتنے او گنہار بخشے جاوندے  
ہوون اس دربار نوں لکھاں سلام  
جھوٹھ اگے سر نوا یا نہ جہے  
اوس دی دستار نوں لکھاں سلام  
بھلیاں نوں سدھا رستا دیا  
دین دے سالار نوں لکھاں سلام  
جہے سچائی تے لکھاں دکھ جرے  
عزم دی دیوار نوں لکھاں سلام  
جو غریباں دا بڑا دلدار سی  
اوس دے ایس پیار نوں لکھاں سلام  
جیہوں خالق نے بلایا عرش تے  
اس خدا دے یار نوں لکھاں سلام  
حشر نوں جو کہسی امتی امتی  
اپنے اوس غمخوار نوں لکھاں سلام  
جس دی خاطر دو جہاں پیدا ہوئے  
مشکور اوس سرکار نوں لکھاں سلام  
ہاجراں مشکور ناصر

ﷺ

خاتم الانبیاء تے ہزاراں سلام  
سرورِ دوسرا تے ہزاراں سلام

فرش توں عرش تک چانی اوس دی  
جن تے سورج دے وچ روشنی اوس دی  
اوس بدرالدجی! تے ہزاراں سلام

بن کے آیا اوہ غمخوار انسان دا  
دکھ تے درد زمانے دے سب جان دا  
اوس مشکل کشا تے ہزاراں سلام

چمکے دھرتی دے مکھ تے جمال اوس دا  
گونجدا انبراں تے ہے جلال اوس دا  
احمد مجتبیٰ تے ہزاراں سلام

(شاعر۔ نامعلوم)